

## KOLITI Napa 1

### Polu koyoto epi'ehina fayahi

**1-2** Hu'mamofahi ai ka'alo Yesu Kilisitohi aposolo lolo hilane luto nele'mo eto hu'ehina bo Poluita nani'ni ya'ma lalalutifu Soseten'i hiti moneka nohutoti'a Koliti hepatoga Hu'mamofahi naga'i lenalitoga fayaha nasana ya'ma koyoto nolepu'ibe. Lenali Yesu Kilisito lenele'mo bati higo Hu'mau bona'i minalabe luto elesa molo lepi'ehina. Lenali hiti to noto notomagi hiti Sipi Bo Yesu Kilisitohi gi'a kumu keheli li pili ke'ahana bona'i enali hiti moneko elesa molo lepi'ehina. Yesu ai enali sipi bo'ani hiti lali sipi boti hiti nohinagihe.

**3** Afotifu Hu'mamofahi aitogati to Sipi Boti Yesu Kilisitohi aitogati lenehe'mose'na to fuluna'a lenalitoga mino moloto mineno.

*Koliti bonatoga mono'mofahi amuya'a huto hu'ehina'mu foke ka lu'ehina*

**4** Hu'mau ai Yesu Kilisito kumu yabe luto lenehe'mose'na lenele'mo hetofa hu lepolo'ehina'mu nani lenali kumu luto keheliloto kana'amu kana'amu Hu'mamofahi foke ka lulata nohubue.

**5** Ai Hu'mau ka keta mehuse lu huto hulatana to kehelise'na fato fato nasanatu lenele'mo hetofa hu'ehigo mono'mofahi mina'a babu luto li'ahana'a ya'ma ni'ibe.

**6** Kilisitohi kaga'auba komopatinigu ule'ale huto fuluna'a huto hu'ehina.

**7** Ya'mu lenali fa'mene Sipi Boti Yesu Kilisito alahi metoga huto hilina'mu geba hite nehitte Hu'mamofahi kamofahi legeya'a mone lenebe meligise lenalitoga ahuto hu baga i'ehina yabe.

**8** Ai ya'ma Sipi Boti Yesu Kilisito henetilina kanalo foipanatini meminenogo to lufusatini amuya malago minalabe luto kaba hu lepoloba lepoloba nohinogo kanatini su halibe.

**9** Hu'mamofahi pana'a Yesu Kilisito lali Sipi Boti ya'ma aitoga i ke'malabe luto elesa molo lepilina yana'mu ai hetofa hu lepalalina'a akeheli'ohune.

*Koliti bona'i enali mono kumu lite loko luku hi'ahana*

**10** Nalalu'nigitabe. Nani Sipi Boti Yesu Kilisitohi gi'alo yabe luto lu hokolo hu lepito ya'ma lilugi, kehelilo. Lenali kaga fato fato'i nelite loko mehilo mono ka'mu nekehelite lengekesa hiti komopatini le'mo moneko hite minalo.

**11** Na'o bogiyo. Nani folagahatinigu kenasabo bise ka huto nohina ya'ma Koloehi bona'amagi lago keheli'ohuna ya'ma lu nolepube.

**12** Ya hu'ehina'mu ka'a ma luto nolube. Lenalitogati luga'amagi lali Poluhi naga'i nohune lite lilata nehabe. Ya lite nelago luga luga'amagi lali Apolosihi naga'i nohune lite lilata nehabe. To luga'amagi lali Pitaha naga'i nohune lite lilata nehabe. To luga'amagi lali Kilisitohi naga'i nohune lite lilata nehabe.

**13** Yamofahi hena hena hu'ehibe? Enali Kilisitohi loko hi'ahago pana'alobomagahi hiti loko hi epele'ahana ni'ifihe? To Poluita, nani lenali kumu yabe luto malipu yafalo fili'ohufihe? To

Poluita nani nigi'niuba ho hauta holago mono nagami'i fele'ahafihe? Ya huto meni'ibe.

<sup>14</sup> Nani lama'naka mono nagami'i mefolo lepolo'ohunamo ni'inagihe. Ya hu'ehina'mu komopa'nigu bati nohubo. Bo loemo Kilisipoko Gaiyasiko hiti etalisigo folo etoto'ohunamo ni'ibe.

<sup>15</sup> Lenali ya lite li lalabe luto: Ai gi'auba ho hauta lahago mono nagami'i folo'ohutamo ni'ibe. Lenali ya'ma lu lalabe luto nolube.

<sup>16</sup> To mone ma luto nokehelube. Setefanohi bona'a enali hiti folo epolo'ohuna luga'a enali kumu mekehelube.

<sup>17</sup> Kilisitou ai naga'a mono nagami'i folo epalalane luto noho melifi'ehibe. Ai ka'a lamana'a lu huto huto hu epilane luto lu neto'ehinamo ni'ibe. To ana huto Kilisitou ai melugu bona'magi nelana ka lu epilane luto noho melifi'ehibe. To hena'mube? Ya'ma nelana kagauba Kilisitou malipu yafalo fili'ehina kagamofahi amuya'a limi lalibe luto yabe.

### *Kilisito ai Hu'mamofahi felisa to kehelise'na'a ni'ibe*

<sup>18</sup> Kilisitohi kaga'a amuya'a amuya'a hiti ni'igo yana'mu ma kehelilo. Malipu yafalo fili'ehina kaga'a ya'ma kegeiyo bona'magi fililana kapogu melelata nehana nekehelite negi nasana yabe lite nelanaya to lali'i kapo lamana'agu nobuta bona'magita kehelutogo Hu'mamofitogati amuya'a kaga ni'ibe luto keheli'ohune.

<sup>19</sup> Yanana'mu mono bukugu Hu'mau lu'ehina ka mone ma luto fayahi koyo'ehinamo ni'ibe: Nani enali kehelise'nati bati hu'ehibe lite

nelana bona'magihi  
 kaga'ani ho laga hinogo  
 limilina'mu yabe.  
 To kehelise'nati ni'ibe lite  
 neminana bona'magihi  
 kehelise'na'ani yamofifi  
 keheli he'miluna'mu yabe.

**20** Ya'mu kehelise'nati ni'ibe lite neminana bona'i hiya'a hite minalabe? To mono kamofifi keheli akeheli nohune lilata nehana bona'i hiya'a hite minalabe? To yatai kanamofifi hapa'amu kaga foya lilana bona'i hiya'a hite minalabe? Hu'mau ai'a bona'magi kehelise'na'ani fa'mene kaga ni'ibe luto keheli'ehina yabe.

**21** Ya'mana hapa'a ma ni'ibe. Hu'mau kehelise'na'a amuya huto nohigo bona'i enali'ani kehelilata nehana yanatu Hu'mamofifi hapa'a bu galune lite alune'mu bati mehi'ahana. Ya'mu Hu'mau keheligo bati higo Kilisito fili'ehina ka'a lu epise'na ya'ma bona'magi kehelite negi nasana yabe lite nelana'a ya'ma bona'i luga'a lu epugo kehelite aitoga agoya hu emilune lite fifa neigo Hu'mau enubuto bilata nohibe.

**22-23** Yuta naga'magi enali ya'ma ka kehelilune lite topa hose nasana hulenogo bu galune lite amuya nehabe. Giliki bona'i ana hite enali ananamofifi hapa'a kehelilune'mu nelite sa sa nehite kupomo'i fite minelata nehabe. Ya nehanaya lali ya'ma Kilisitohi malipu yafalo he'ahanamofifi kaga lunogo Yuta bona'magi enali keheligo keta hulata nohibe. To Giliki bona'i enali kehelite negi ka yabe lite lilata nehabe.

**24** Ya nehanaya lali Hu'mau lele'mo'ehina bona'magita Yuta bona'i nohuta Giliki bona'i hiti nohuta laliya Kilisito kumu nokeheluta ya'ma Hu'mamofiji felisa to kehelise'na'a ni'ibe luto nokehelune.

**25** Bona'magi enali Hu'mamofiji foya'mu Kilisito malipu yafalo fili'ehina ya'ma negi nasana ni'ibe lite nelago ana Hu'mamofiji negi nasanauba bona'magihi kehelise'na'ani be ligilata nohibe. To Hu'mamofiji foya'mu amuya'a meni'ibe lite nelago ya'ma Hu'mamofiji amuya meni'ina nasanauba bona'magihi amuya'ani be ligilata nohibe.

**26** Nalalu'nigitabe. Hu'mau lali hena legit bona'i elesa molo lepi'ehinamo ni'ibe? Beto hite kehelilo. Asaga bona'magihi lenali kumu hetofa kehelise'na'ani hiti keheli fe lite mine'ahana'a babu lite nehabe lite nelafiye? O'e ya menelabe. To amuya bona'i lenalitoga babu lite nehabe lite nelafi? Ya menelabe. To ana huto lenigi hite nehana'amagihi lenalitogati babu lite nehabe lite nelafi? Ya menelabe.

**27** Ya nehanaya bona'magihi enubulo kehelise'na'ani batih mehina'a lali Hu'mau lele'mo'ehina yabe. To bona'magihi enubulo amuyati menina'a lali Hu'mau lele'mo'ehina yabe. Hena'mube? Enali kehelise'natih batih hu'ehibe lite to amuya hiti nohune lite lilata nehanamagi enubuya'ani hulata hilabe luto yabe.

**28** To bona'magihi enubulo limite nehana'a ya'ma Hu'mau elesa molo epilata nohibe. Hena'mube? Bona'magihi enubulo enikibina

lolo hite mina'ahana'a hiti to fa'menena'a hiti  
enali Hu'mau lukesa'ani sigilata hilibe luto  
enele'mo laba hilina'mu yabe.

<sup>29</sup> To ya higo melugu bona'i moneuba  
Hu'mamofifi bulo gufa'a limo titi lalibe luto  
ya suhi hu'ehina ni'ibe.

<sup>30</sup> Ya hu'ehinaya Hu'mau lali Yesu Kilisitotoga  
lele'mo hepi'ehina yabe. Kilisitou ai ya'ma  
lali Hu'mamofifi ka'a keheli bebe salutamofifi  
hapa'a minalibe luto yabe. To ai Hu'mamofifi go-  
bisalo mino fu luto minalutamofifi hapa'a minal-  
ibe luto, to foipanati li he'mi letelenogo komopati  
gulu gulu linogo minalutamofifi hapa'a minalibe  
luto yabe. To ai Kilisitou lali'i foipanaguti gulu ho  
letalibe luto yabe.

<sup>31</sup> Ya'mu kaga mone mono bukugu ma lite  
fayahi keye'ahana ya'ma ule'ale hilibe: *Lenali  
fokehi lilune'mu nehana bona'magi Sipi Botiuba hu  
lepolo'ehina'amofifi fokeha'a lilo.*

## 2

*Polu Kilisitohi he'ahanamofifi ka'a beto hu  
epi'ehina*

<sup>1</sup> Nalalu'nigita nani lenalitoga neheti'ohunamo  
ya'ma Hu'mamofifi suguna ka'a lu lepilube luto  
ya'ma kehelise'na'ani bati hu'ehina bona'magihi  
kaga lilata nehana supo huto laga hina ka lu  
melepi'ohube.

<sup>2</sup> O'e. Nani ma luto keheli amuya mololoto  
bu'ohunamo ni'ibe. Nani lenalitoga buto no-  
huto'ni kaga luga'a melu'ohuna yagi Yesu Kilisito  
ai kumu hiti to malipu yafalo he'ahana yamofifi

ka'asigo beto hu lepilube luto keheli'ohunamo ni'ibe.

<sup>3</sup> To lenalitoga foiya bito nehetilube'mu no-huto laga lepesifi melepesifi luto mino'ohuna ya'ma amuya'ni meni'igo nefelele'i bigo afoya ito mino'ohunamo ni'ibe.

<sup>4</sup> Ya huto nohuto Hu'mamofiji kaga lu'ohuna lenegekesa lilube luto metoga bona'magi ke-helise'na'ani ni'ina kagaguti lenimi molose ka lu melepi'ohube. Hu'mamofiji amuya'auba to Sikalafu'uba nani'i kaga'ni le'mo hetofa hu'ehigo legeya'a lolo hulata hu'ehibe.

<sup>5</sup> To ya higo lenali Hu'mamofi kumu ke-heli amuya malalana yanauba bona'magi ke-heli fe lilata nehana yamofiji meni'ibe. O'e, Hu'mamofiji amuyalo lenifita ilabe luto ya hu'ohunamo ni'ibe.

### *Hu'mamofiji suguna ka'a Sikalafu'uba lu huto hulata nohibe*

<sup>6</sup> To ya huto ni'inaya nani ka keheli bati mehuse liluta ni'ifihe? O'e. Nani lama'naka Hu'mamofiji kagu hofa tete mine'ahana bona'amagi ya'ma keheliya ito kagaguti lu lepilata nohube. To ya nohutaya ya'ma metoga enighiti bona'i filite fa'menena lolo hilanamagi keheli fe lite kaga lilata nehana ya suhi huto liluna'a meni'ibe.

<sup>7</sup> O'e, nani keheli bati huto lulata nohuna'a Hu'mau koyapa'i komopa'agu suguna huto ke-heli molo'ehina yamofiji lu huto hulata nohube. Keheli molo'ehina ka'a ya'ma bona'magita lali Hu'mamofiji fana meha'agu minalune luto koyapa'i ana'ina li huto mehina yupahi Hu'mau le'mo keta mehuse huto molo leto'ehina.

**8** Metoga enighiti bona'magi enali anamofifi keheli molo'ehina kagamofifi hapa'a mekeheli'ahabe. Kehelitita yamofifi lali Sipi Bomofifi fana mehenamofifi afo'afifi ya'ma malipu yafalo mehatita'mu yabe.

**9** Ya hu'ehina'mu kaga mone ma lite mono bukugu fayahi keye'ahanamo ni'ibe:  
 Bona'magi bu mege'ahana  
 to enegekesatu mekeheli'ahana nasana,  
 to bona'magihi komopa'anigu  
 mekeheli'ahana nasana,  
 ya'ma Hu'mamofifi  
 komopa'ani emi'ehilana bonatoga  
 le'mo huto hilina'mu yabe.

**10** Ya nasana'amu Hu'mau ai Sikalafu'a ho lifigo oto lu huto hu limilata nohibe. Ana Sikalafu'uba silaga bona'magihi komopa'anigu to Hu'mamofifi komopa'agu fala kito ni'ina'a hiti kehelilata nohinagi ya'ma lu hokolo hu leto'ehibe.

**11** Hiya boubwa ya'ma lalu'afifi komopa'amofifi hapa'a keheli'ehibe? Komopa'amofifi afo'afu ai'asigo kehelilina'mu yabe. Ana huto Hu'mamofifi komopa'amofifi hapa'a ya'ma Hu'mamofifi Sikalafu'uba moneko ai'a kehelilina'mu yabe.

**12** To lali ma melugu bona'magihi sikalafu'i meli'ohutamo ni'ibe. Lali Hu'mau mono ka molo leto'ehina yamofifi keheli fe lilune luto Hu'mamofifi Sikalafu'a li'ohutamo ni'ibe.

**13** To ya higo lali'i bona'i luga'a Hu'mamofifi Meha'a li'ahanamagihi ai ka'a lu keheli huto lu epiluta nohuto lali bona'magi keheli'ahana ka lu

epiluta meni'ibe. Lali Hu'mamofiji Sikalafu'uba lu limilina ka'asigo lulata nohune.

<sup>14</sup> Bona'i luga'a Hu'mamofiji Sikalafu'a hiti menehilana bona'i enali ya'ma Hu'mamofiji Sikalafu'mofiji kaga'a mone mekehelilana'mu yabe. Enali hena hite kehelilabe? Meni'ibe. Sikalafu'i hiti nehilana bona'magi kehelilana'a huto ni'inaya, Sikalafu'i hiti menehilana bona'magi kehelinogo fa'mene kaga legi lolo hilube'mu hibe.

<sup>15</sup> Lali hetofa Sikalafu'i hiti nohiluna bonago nasana asaga'i fa'mene bu go fe lilana'a ni'inaya bo moneuba enali hapa hapa'ani lu huto mehilube'mu higo keheli bati menehabe.

<sup>16</sup> Ya hu'ehina'mu kaga ma lite keye'ahanamo yamofiji lamana'a ni'ibe:  
 Sipi Bomofiji komopa'agu kaga ni'ina  
 yamofiji bo mone  
 ki'afu kehelilina ni'ibe?  
 Kaga'ago noligo  
 ya'ma hiya bouba le'mo bati higo  
 lu'ehina ni'ibe?  
 Mone meni'ibe.

Mone meni'inaya lali ya'ma Kilisitohi kehe-lise'na'a lu huto hu letago nominone.

### 3

*Bona'i Hu'mamofiji foyalo bona'a lolo hite nehana*

<sup>1</sup> Nigibo nalalu'nigitabe. Ya'ma kaga lu lepi'ohuna'mu nani lenalitoga ma melugu bona'i kehelise'na'ani hiti lu epilata nohuna'a ana suhi huto lepi'ohube. Lenali mono kagu amuya

memelese Kilisitohi lagaso yagapana'i inapu tegi hite nehago nani Hu'mamofifi Sikalafu'a hiti menehana'a lu epilatamofifi ya'ma lu lepi'ohube.

<sup>2</sup> Nani komopatinimofifi amuya nose'na melepise fa'mene amipo lepi'ohunamo tegi huto ni'ibe. Komopatinimofifi amuya nose'na ya'ma hiya hite nalabe? To lenali yatai ya'ma nose'na amuya nalana bona'magihi legegeto menehabe. Lagaso yagapana tegi hite neminabe.

<sup>3</sup> Lenali koyapa'i mine'ahana legegeto fa'mene nehabe. Lenali ai siko higo ai siko higo nehite luba sabo hite fa'mene bona tegi hite mine'ahana suhi hite ya'ma hapa'amofifi huto huto ni'igo koyapa lenemehiti minelata nehabe.

<sup>4</sup> Lenali luga'amagi Poluhi bona'a nohune lite nelago to luga'amagi Apolosihi bona'a nohune lite nelana bona'i ya'amagita lenali kumu fa'mene melugu bona'i suhi hite nehabe luto lu lepalaluna'mu yabe.

<sup>5</sup> Lenali lali'i henabe lite loko hilata nehabe. Apolosi hiti Polu hiti le'ali fa'mene Hu'mamofifi koko pana'amale'ita Sipi Bouba lilina ka lu le'eto'ehina'a huto ka lu lepito nohu'igo ai kumu agoya hu emi'ahanamo ni'ibe. Hu'mau le'emi'ehina lili'na lili'ina ni'ibe.

<sup>6</sup> Bigaha'a nani'ni lito kofo'ohuna ya'ma suhi huto nani folagahatinigu lili'na hapi fi'ohuna. Apolosiu ai bigaha'alo nagami'i hekito ligilata Hu'mau ya'ma lusa agigo legeya'a holata nohibe.

<sup>7</sup> Ya hu'ehina'mu lito kofolata nohina bo ai kumu melilune to nagami'i ligilata nohina bo ai kumu meliluta ni'inaya lusa gigo legeya'a le'mo

holata nohina bo Hu'mamofahi ai moneko kumu lilune.

<sup>8</sup> Lito kofolata nohuna to nagami'i ligilata nohina le'ali moneko legegeto nohu'ibe. Mina'a ya'ma lili'na li'ohu'ina legegeto eto eto huto lilu'ina'mu yabe.

<sup>9</sup> Le'ali Hu'mamofahi lili'nalo bo'a nohu'ibe. Hu'mamofahi foya'a lenaliya nehabe.

To mone hiti fono ka luto lenali Hu'mamofahi nohi hepa'a lolo hite nehabe.

<sup>10-11</sup> Hu'mau lili'na nimi'ehina'mu luto nani nohi gise'namofahi lamana'a ufe'ye yafa lukesa lito fi'ohuna. To anamofahi gupisalo bona'i luga'amagi molo emite nohi gilata nehabe. Lukesa fugo mino'ehina ya'ma Yesu Kilisito yabe. Ya'ma li sigito mone fato lukesa aku'i filana'a meni'ibe. Yana'mu nohi neginamagi keheli fe lite minete kaba hite gilabe.

<sup>12</sup> To lukesa yamofahi gupisalo moneuba goli efahi yatufi, to siliba efatufi, to mina'a tito nina efatufi, to helebole yafatufi, to akepatufi kifinatufi gilina yamofahi minoto nohi gi'ehina ya suhi huto hapa'a huto hilube'mu hibe.

<sup>13</sup> Minoto Kilisitohi Sipi Yupahi alina kanagu hapa'a huto hilina'mu yabe. Ya nehinogo logo sipi i kulu tilube'mu hibe. To ana logouba nohi negite lili'na li'ahanamofahi hapa'a li huto hilina'mu yabe.

<sup>14</sup> Bo moneuba lukesamofahi gupisalo nohi gi'ehina ana logouba lo su mehalinagi fa'mene minalina yamofahi ai'a mina'a lilina'mu yabe.

<sup>15</sup> To bo moneuba nohi gi'ehinamofahi lili'na logouba lo su ho etalina yamofahi ai mina'a

melilina'mu yabe. Ai lili'na lito gi'ehina Kilisitou li fekilito to ana bomo logoguti buto bilina'mu yabe.

**16** Lenali ya'ma Hu'mamofifi sipi mono noha'a nehabe to Hu'mamofifi Sikalafu'uba komopatinigu minoto nohina yamofifi mekeheli'ahafihe? Ya'ma lenali akeheli'ahana.

**17** Hu'mamofifi noha'a ya'ma eto huto ni'ibe. To ai noha'a ya'ma lenali nehanagihe. Luga'amagi enali Hu'mamofifi sipi noha'a li sibina hilanamofifi Hu'mau ai'a ana suhi huto ana bona'i enele'mo sibina hilina'mu yabe. Ya'ma lenele'mo sibina hilana bona'magihi Hu'mau enele'mo sibina hilina ni'ibe.

**18** Lenali komopatini keheli sibina mehilo. Lenalitogati moneuba nani ma melugu bona'magihi kehelise'na'ani bati huto li'ohuna bo nohube luto lilina ya'ma ai kehelise'na'a he'mito bona'magihi enubulo kehelise'na bati mehina bo lolo huto minalibe. Henabe lutobe? Ai ya hulenogo lusi kehelise'na Hu'mamofitogati lilibe luto yabe.

**19** Metoga bona'magi kehelise'na'ani yamofifi Hu'mau kehelinogo legeya'a lolo mehilina'mu yabe. Ya hu'ehina mono bukugu Hu'mau kumu kaga mone ma lite fayahi keye'ahanamo ni'ibe: *Hu'mau ai enali keheli fe lu'ohune lite ana'ina neligo kofohi nemele epalago kofohi molo'ehinagu ananamofifi bagagu enele'mo buto nohibe.*

**20** To fayahi keye'ahana mone hiti ma huto ni'ibe: *Sipi Bouba enali keheli fe lite nohuta bo nohune lite nelina bona'magi enegekesa kehelilata nehana ka ya'ma fa'menena lolo hulata nohibe*

*luto Sipi Bouba keheli'ehibe.*

<sup>21</sup> Ya hu'ehina'mu lenali bona'magihi enugufa le'mo lite metilo. Ana'ina silaga nasana lenali kumu yabe luto Hu'mau molo lepolo'ehinamo ni'inagihe.

<sup>22</sup> Nani Poluita to Apolosi to Pita lali ya'ma lenali kumu yabe luto kaba he'mi letago nohune. To melugu nasana silaga'i to minolatanafi fililatana to yatai ni'ina nasana alahi huto hilina nasanamofhi silaga'i lenali nasana ni'ibe.

<sup>23</sup> To lenali ya'ma Kilisitohi bona'a nehabe. To Kilisito ya'ma Hu'mamofhi pana'a nohibe.

## 4

*Aposolomagi      Kilisitohi      mono      ka'a  
li'ahanamofhi hapa'a*

<sup>1</sup> Lenali lali kumu kehelinogo Kilisitohi lili'nalo bo'a to Hu'mamofhi suguna ka'a kaba huto leli'ali bo lolo nohuta kehelilo.

<sup>2</sup> To kaba bo'a enali foya'a li'ahanaguti mone tito be ligi'ehina ka henana ni'ibe? Afo'afu lina'asigo hite li'ahanamo ni'ibe.

<sup>3</sup> To nani'ni ka lilube. Lenali hiti to bona'i luga'a hiti lolo hite minete nani hapa'nimofhi kehelinogo lamana'a lolo mehilina'mu yabe. To nani'ni hapa'ni beto mehiluna'mu yabe.

<sup>4</sup> Nani nipa'nigu keta mehuse nohuto foipana'ni ni'ifi meni'ifi mekehelube. To ya hu'ehina lenali folagahatinigu lili'na li'ohunogo foipana'ni meni'igo nohube luto melilube. Nani hapa'nimofhi Sipi Bo moneko'uba li huto hilube'mu hibe.

**5** Ya hu'ehina'mu lenali bona'magihi hapa'ani'mu lilata nehana amuya memalalo. Sipi Bouba ai'a i behe huto oto suguna'i fenene huto ni'ina nasana yamofahi le'mo hutotoga malalube'mu hibe. To bona'magita legekesa kehelilata nohutaga hiti ya'ma li huto hu su halube'mu hibe. Ya huloto Hu'mau ai'a bona'magihi hapa'ani moneko moneko'isi bu galina guna moloto enele'mo hetofa hu epololota liyafa hilube'mu hibe.

**6** Nalalu'nigita lenali lali hapati ya hite bu gelete keheli fe lilabe luto kaga nolunamofahi nani to Apolosihi le'aliti'a ka lu moloto nolube. Monolugu hite melete minalo lite li'ahana ka'a ya'ma be meligise bona'i luga'a enele'mo ho tila luga'a enele'mobe kohobe mehilo.

**7** Ki'afu ligo lenugufa le'momo titi nehabe? Lenalitoga ana'ina bai toto ni'ina yamofahi Hu'mau ya nasana melepi'ehifihe? O'e. Hu'mau ana'ina silaga'i lepi su 'ho'ehinamo ni'inagihe. Lenali henabe lite nekeheligo Hu'mau ana'ina melepi'ehina lolo nohigo laliti li huto nohune nelite lenugufatini le'momo tilata nehabe.

**8** Lenaliya lenalitini'mu ma lite kehelilata nehabe: Lali lusa gigo ana'inati bai toto ni'ibe. Lali asaga'na keheli baga ito nohune lite nelafiye? Lali menohutogo lenali monolugu kibina bo lolo hite nehafihe? Lenali ya hite lebe ligi'ahanamo ni'ifi ya? Nohune lite lilata nehanaya Hu'mamofahi bulo lama'naka kibina bo lolo hilana ni'inaya, ya hite minete lali'i lele'mete binogo lenalitoga mino moloto ligihiti

bogo ana huto lolo huto minaluta ni'itita bati hitine.

<sup>9</sup> Nani nekesa kehelito ma luto lu nolepube. Hu'mau aposolo hiti lali fa'mene bona'magihi komopa'anigu lele'momo limito molo leto'ehina'a lolo nohibe. Ya hulago lahalana bo nohuta suhi lolo nohibe. Asagatoga agelo bona'i nehana to metoga bona'i nehana enali gili gili hite lali'i lubugo sibina hilago nohune.

<sup>10</sup> Lali ya'ma Kilisito kumu yabe luto negi bona'i lolo huto nohutaya, lenali ya'ma Kilisitotoga nokeheluta nasanati bai toto ni'ibe lite kehelilata nehabe. Lali amuya hiti menohutaya lenali amuya hiti bo likibina bo tegi hite lolo nehana. Ya lite nekehelihi? Bona'magi lama'naka luto lali'i ya'ma lele'mobe hokobe hilata nehanaya to fato bona'magi lenali lenugufa le'momo tilata nehabe.

<sup>11</sup> Yatai huto nohina kana'alo lali ya'ma nose'natim mu yafi nagami kumu kau'na nolahago filito nominone. Guketeti meninana nohune. To osahi lehelata nehabe. Nohati meni'igo bula ola huto fa'mene nominone.

<sup>12</sup> Lugufamofifi nasana huto hilibe luto laliti layahatitu amuya foya lito li huto hulata nohune. Lali kumu lele'mobe hokobe hi'ahana bebe sose ka lu epololata nohune. Kalana'i nemele letago lipakafa menohose fa'mene nominone.

<sup>13</sup> Yatai huto nohina kana'alo lele'mo sibina nehanaya fa'mene enele'mo fulu hulata nohune. Lali fa'menena lolo huto bona'i asagatoga sosopana legi huto minolata nohune. Ya'ma lali minomo buto yatai hiti ya huto nohune.

<sup>14</sup> Nani lenubuya hilibe luto ya'ma kaga fayah

menokoyobe. Nani komopa'ni nolepuna pa'ni pana'ni lenegekesa li hokolo huto fayahi ya'ma nokoyobe.

<sup>15</sup> Kilisitohi kamu'i babafi lilana bona'i ya'ma babu lite nehanaya afotinigi asaga'i menehabe. Yesu Kilisitohi hetofa ka kohe toto lu leptito aitoga lenele'mo bu'ohunagi afotinifita nani'nisigo lolo huto nohube. Ya'mu lenali pa'ni pana'ni yabe luto lu'ohuna.

<sup>16</sup> Ya hu'ehina ya'ma nani nigliyakagu ite ne-mege talabe luto lenegekesa lito nolugi kehelilo.

<sup>17</sup> Nani ya hilabe luto Timotih ho lufugo lenalitoga foiya nobibe. Ai'i komopa'ni emi'ohuna bo Sipi Bomofiji mono kagu pana'ni lolo huto minoto ana'ina le'mo fu luto lolo hulata no-hina bo ai buto nani Yesu Kilisitohi mono ka'amofiji kapo'a Kilisitohi naga'a noto noto nehana enelepito minolata nohunamofiji buto aku'i lu lepinogo kehelilabe.

<sup>18</sup> Lenalitogati luga'amagi nani kumu ya'ma mealina'mu yabe lite lenugufa limo titi hite kegeiyo fa'mene minelata nehanaya.

<sup>19</sup> Sipi Bouba lu kehelinogo bati hinogomo nani lenalitoga nobuto kegeiyo hite neminana bona'magihi kagi'ani keheliloto Hu'mamofitoga amuya mele'ahanamo ni'ilifi yamofiji hapa'a li huto hilube.

<sup>20</sup> Hu'mamofiji mono kamofiji kapo'a fa'mene kagagu meni'ibe. Hu'mamofiji amuya'agu yamofiji huto hulata nohibe.

<sup>21</sup> To lenali nani kumu henabe lite lilata ne-habe? Kipakafa'a hiti obo lite nelafihе to komopaka bati hinogo fulu huto obo lite nelabe?

Lenoloka ya nohobe.

## 5

### *Moko lise nasana'mu huto huto ni'ibe*

<sup>1</sup> Lenali kumu ma lite lama'naka lago nani keheluna: Lenalitoga moko lise'na fato'i Hu'mamofifi mekeheli'ahana bona'magitoga ya'ma sipi foipana huto mehuse'namofifi yana hiti huto huto ni'ibe. Lenalitoga bo moneuba afo'afifi liha'a ni'ibe nelago nokehelube. Yana'mu ya'ma nolube.

<sup>2</sup> To lenali henabe lite ana'ina ya'ma huto huto ni'ina yamofi kumu lenubuya nehinogo lenugufa'mu menekehelibe. Henabe lite lenugufa le'momo tilata nehabe? Lenali bati hite keke'i nelite lenubuya hulata nohina nasana lilata nohina bomofifi ya'ma folagahatiniguti li he'mi etalana ni'ibe.

<sup>3</sup> Nani nugufatu foto'i nohuto komopa'niguti yamofifi lenubuya hulata nohina nasana lolo hina bo ai'i kaga ya'ma folagahatinigu nohuto hu tegi huto Sipi Boti Yesuhi gi'alo ka loko hu su hoto ma luto lu nolepube.

<sup>4</sup> Lenali Sipi Bo Yesuhi ai bulo ai amuyalo li gehesa hite nehinogo nani molo kehelito komopa'nitu keheli lepinogo

<sup>5</sup> ana mokolo bomofi folagahatiniguti he'mi etelete Satahi yanugu malalabe luto nolu lepolobe. Hena'mube? Ya'ma gufa'auba foipa nohina hapa'a Satau le'mo sibi hulenogo to komopa'a li gelehe higo Hu'mau ana bo buto bulenogomo Sipi Bo Yesu Kilisito nehetilina kanagu meha'a minalibe luto yabe.

**6** Ana'ina keta'a hiti lite minete lenugufa limo titi nehana yamofahi keheli sibina hulata no-hube. Lenali beleti nose'na lolo nehana hapa'a nekeheliyiye? Beleti nose'nagu mone yisiti kiti-tili ketele'nauba i tili huto bula ola huto yeye bilina'mu yabe. Ya'ma mokolo bomofahi hapa'a yisiti tegi huto lenali folagahatinigu bula ola huto batih mehibe.

**7** Ya hu'ehina'mu yisiti'mu sa sa hite loko hite li he'mi su henogo nebinogo legeya'a laga'a hiti lolo hilo. Lenali ya hilet yisiti nasana meni'ina beleti, Pasa nose'na nalana yupapogu nonotanana hetofa suhi huto minalabe. To hena'mube? Lali lubuto bilatana sipisipi yaga Kilisitohi ya'ma lali foipana'mu yabe luto filiehinamo ni'ibe. To ya'mu aiya lali Pasa nose'na nalata yupapogu holata nohuta sipisipi yaga suhi huto nohibe.

**8** Yamofahi Kilisitotoga hepito legelo bito minalune luto beleti nose'nagu yisiti meni'ina yamofahi foipana hiti moko lilata yisiti suhi li he'mi su holoto yisiti nasana'a meni'ilina nasana yamofahi eto'ehina hapa'a lito to ka lamana'a legeya'amofahi nasana yamofahi nohuto legelo bito minalune.

**9** To nani fayahi mone koyapa'i ma luto koyoto lepi'ohunamo ni'ibe: Lenali kegeiyo hilata nehana bona'i humofa'na hiti meminalo luto lu lepolo'ohuna.

**10** Ya'mu nani Hu'mamofahi mekeheli'ahana bona'magi ana'i guminalo'nafi to yogo fe'nohi babu luto lilube lilatanafi to keya ka li gofa huse'nafi lugefa li filata bofi enali kumu

melu'ohuna. Enali ya'ma me'i he'miluta yupahi mege'i malalutalo nehana yana'mu enali hiti lali hiti melugu nohutoti nominone.

**11** Nani ma luto koyo lepi'ohunamofhi hapa'a ni'ibe: Hu'mamofhi ka nokehelube luto lenala-lutinifu moneuba moko foya lito sibina hilifi to gumesilo a'i lolo hilifi nalisalo lugefa nasana lito minalifi to bona'magi enemegeka lilifi to negi nagamitoko humofa'na hilibe, to keya ka i gofa huto humofa'na hilibe, bona'i ya hana'a hiti mino hepito nose'na menalabe luto lu lepolo'ohunamo ni'ibe.

**12-13** Nani fegutoga bona'i nehana enali'i kaga luto lu laga hu epolose'na yamofhi nani foya meni'ibe. To enali fegutoga nehanamagihu foipana'amofhi kaga ya'ma Hu'mau loko huto lilina'mu yabe. Lenalitini folagahatinigu mono ka nekehelina bona'i enali'i foipana'animofhi kaga'amu lilana yamofhi bati hilube'mu hibe. Ya hu'ehina'mu mono bukugu ma lite keye'ahanamo yamofhi kehelite minalo: *Foipa bo ai'i he'mi etenogo folagahatinigu memineno.*

## 6

*Mono'ani meni'ina bona'magihu enubulo foipanamofhi ka'a melilo*

**1** Lenalitogati moneuba ya'ma lalu'afhi foipana'a lito nohilinauba ai ana kaga'a ya'ma mono bona'magitoga lu huto mehuse mono'ani meni'ina bona'i enalitoga bite ka foya lulata nohina ya nasana'mu lenubuya menohifhe?

<sup>2</sup> Lali Hu'mamofahi bona'a nohunogo alahi fegutoga bona'magihi ka'ani loko hiluta'a mekehel'i'ahana ni'ifihe? O'yo, alahi lenali fegutoga bona'magihi kaga'ani loko hilabe. To ya hilana'a ni'igo henabe lite lenali folagahatinigu ni'ina ka nesi'asi ni'ina'a loko menehabe?

<sup>3</sup> Lenali nekehelihihe? Lali minoto agelo bona'magihi kaga hiti loko huto lilune'mu hune. Ya hu'ehina ana'ina fa'mene nasana ya'ma huto hulenogomo, keta mehuse huto fa'mene lu laga hilune'mu hune.

<sup>4</sup> Yamofahi kaga'a huto nehinogomo lenali hena'mu Hu'mamofahi bona'i nohuta lali nokehelutogo limilata nohina bo enalitoga lelite bilago lu laga hi lepelelata nehabe?

<sup>5</sup> Lenali ya'ma kaga kehelinogo lenubuya hilibe luto lu nolepube. Lenalitoga ekesa hokolo hina bo mone menohifihe? To lenalitoga kagatini huto nehinogomo aitoga lelite binogo le'mo fulu lepalalinamoya, lenali ya'ma ya suhi menehana yabe.

<sup>6</sup> Lenalitoga moneuba lalu'afi hiti foipana'atiti huto hulenogomo Hu'mamofahi mekeheli'ahana bona'magitoga lelito bigo lu laga hi ete'ahabe. Bati mehina suhi nehabe. Lenali ka foya huto hulata nohina yanauba mono katini li kele lilata nohibe.

<sup>7</sup> Lenali bona'a mone'amagi foipana hi lepenogomo henabe lite legese hite fa'mene mene-minabe? Lenele'mo sibina hinogo ya bati hitine. To ai foyagu le'mo melenogo ai ka foyagu le'mo melenogo nehite ya bati mehu'ehibe.

<sup>8</sup> Lenali ya'ma lenalitini hiti ana nasana li

sibina nehago gumina bauka nelata nehabe. Ya  
nehite lenali kogunatini hiti ana suhi hi epelelata  
nehabe.

<sup>9</sup> Ana'ina foipana lilata nehana bona'magi  
Hu'mamofiji ai kapo'agu henetilana'a meni'ibe.  
Yamofiji mone keheli'ahafihe? Lenali komopati-  
nigu keheli sibina mehilo. Moko takolo bona'i  
to nalisa lugefa bona'i to ibe sili abe sili bo  
to bo luga'a bomagihi enugufa li sibina nehit  
ana'magi suhi hite minese bo

<sup>10</sup> to gumina taminalo bo to fe'nohi samahi tito  
lilube lilata nehana bo to bia nagamitoko hu-  
mofa'na nehana bo, to enemegeka lilata nehana  
bo, to fakupa ka lite luba hilata nehana bo, ya ne-  
hana'amagihi Hu'mamofiji kapogu metilana'mu  
yabe.

<sup>11</sup> To lenali luga'a koyapa'i ya suhi hite  
mine'ahanamo ninaya yatai foipanatini ahe'mi  
lepoloto Hu'mamofiji bona'i minalabe luto ko-  
mopatini okala huto le'mo babahi higo ne-  
habbe. Sipi Boti Yesu Kilisitohi gi'alo yabe luto  
to Hu'mamofiji Sikalafu'amofiji gi'amu luto  
lenele'mo bati higo nehabbe.

### *Hu'mamofiji gi'a lenugufatinitu hofa talo*

<sup>12</sup> Lenali asaga hapa'a keya'i meni'igo bati  
huto hiluta'mu yabe lite lilata nehabbe. Ma'naka  
nelanaya to asaga hapa'a yanauba lenele'mo bati  
mehilina'mu yabe. To nani ana huto asaga  
hana'hapa'a bati huto hilune lite nelana ka mege'i  
malalufiye? O'e. Mone hapauba naga'i nimi-  
lenogo bati mehibe.

<sup>13</sup> Lenali ya'ma nose'na lipagu nasana ni'ibe to gupatigu ya'ma nose'na'mu ni'ibe lite lilata ne-habe. Ma'naka nelanaya minoto Hu'mau ai ana hiti ana hiti he'minogo fa'menena lolo hilube'mu higo su halina'mu yabe. Lugufauba ya'ma moko'mu yabe luto meni'ibe. Sipi Bomofahi nasana ni'ibe. To Sipi Bouba ai'a lugufamofahi afo'afu nohibe. O'yo, lali aku alihia Hu'mamofahi bulo ho tito minonogo ai lugufa'mu ka foya li letalina'mu. To lali lugufatu Sipi Bomofahi gi'a li hofa talune.

<sup>14</sup> To Hu'mau Sipi Bo Yesu fili'ehinaguti le'mo ho ti'ehina ana suhi huto amuya'aloti lali'i lugufamo lele'mo ho tilube'mu hibe.

<sup>15</sup> Mega lenugufauba Kilisitohi gufa'amofahi nekisa'a ni'ina yamofahi menekehelihi? To Kilisitohi gufa'amofahi nekisa'a mone kapolo a'i hiti le'mo moneko'na hilupihe? Ai ya huto meni'ibe.

<sup>16</sup> Lenali ya lite menekehelihi? Bo moneuba mokolo a'i moneto i kelelenogo etali etugufa'atiti le'mo moneko hilete minala'ina yamofahi mono bukugu fayaha kaga mone ma luto ni'inamo ni'ibe: *Etali loemale'ititih etugufa'atiti moneko lolo hulenogo hepite minala'ibe.*

<sup>17</sup> Ya huto ni'inaya luga'amagi enali Sipi Bomofitoga i hepilenogo ai hiti komopa'ani moneko lolo hilube'mu hibe.

<sup>18</sup> Lenali moko takolo nasana mele'isi he'mite bilo. Bona'i moneuba fato foipa nasana lilina ya nasanauba ai'a gufa'alo le'mo sibina mehilibe. To moko tako lilina ya nasanauba ai'a gufa'a komopa'a le'mo sibina hilina'mu yabe.

<sup>19</sup> Lenali ya'ma lite mekeheli'ahafihe?

Lenugufatini ya'ma Sikalafu'mofahi sipi mono nohi ni'ibe. Hu'mau lenali lenugafamofahi komopa'agu minoto lito hilibe luto molo lepolo'ehina yabe. Lenali ana lenugufamofahi afo'agita menehabe.

<sup>20</sup> Hu'mau lenali mina'a fi lepolo'ehinamo ni'igo lenali lenugufamofahi ai'asigo ni'ibe. Ya hu'ehina'mu lenugufauba Hu'mamofahi gi'a fi hele hu eteno.

## 7

### *Bo alobomagihu enali ka*

<sup>1</sup> Lenali fayahi keyete nenimite ma lite noloka he'ahanamofahi lu huto hilugi kehelilo. Bo moneuba liha'a melise minalube luto lilina yamofahi bati huto ni'ibe.

<sup>2</sup> To ya hu'ehinaya kaga mone ni'igi kehelilo, moko lise'nauba enim'i mololatana nasana babu luto ni'inago ya nasanauba enemeto enemeto hite, lenali ana'i lilete lihatini hiti minalana yamofahi bati huto ni'ibe. To ana'i enali ana hite bahatinilo bite bahatini hiti minalanamofahi bati huto ni'ibe.

<sup>3</sup> To bo kaiya kugufaka mone kegi'amofahi li-haka o'e melu etobo. To ana huto a'maka kugufaka mone kegi'a bahakamofahi o'e melu etobo.

<sup>4</sup> A'i, kai kugufakamofahi kaga'a kaitogati meni'ibe. Bahakamofahi nasana ni'ibe. To bomaka kai kugufakamofahi ka'a ya'ma kai'na meni'ibe. Lihakamofahi nasana ni'ibe.

<sup>5</sup> Bo alobole letali letugufamofahi lite amanapa lolo mehiliyo. Fa'mene Hu'mamofitoga nunumu hite malalu'ibe'mu keta mehuse hite kanatiti kanatiti lu kehelilete kana'a melelete lila'ina

yamofahi bati hilube'mu hibe. Malala'ina kana'a su holenogomo aku'i li hepite malaliyo. Malala'ina kana'a be liginogomo yamofahi Satau ai enim'i molo hinogo foipa hi lalibe luto nolube.

**6** Bo alobo hite minalabe luto lu memolo lepolobe, fa'mene keheli leptito nolube.

**7** Nani komopa'niuba ma luto nolibe: Nani nohuna suhi hite kofuta minalanamoya. Ya hu'ehina'mu Hu'mamofahi amuya'auba fato fato suhi huto lele'mo huto hu'ehina yamofahi kapo'a fato fato suhi huto ya suhi ma suhi huto ni'ibe.

**8** Yafa'ana'i hiti to neheya kola hiti to keto ana'i hiti enali ka'ani ya'ma ma luto nolube. Enali nani suhi lite bolo mebise ana'i melise mineme bilana yamofahi bati hilube'mu hibe.

**9** Ya hilanamoya moko lise lenegekesa yamofahi bo alobo topa helatana lenegekesa kehelilanamo, yanamofahi logo'auba lenele'mo sibina hu laligi bati hite bo alobo lolo hite minalo.

**10** Bo alobo lenali kaga lilugi kehelilo. Yamofahi nani ka'nisigo meni'ibe. Sipi Bomofahi bagaguti kaga hiti nolube. Lenali ana'magi bahatini mehe'mi epalalo.

**11** To bahatini he'mi epelete yamofahi bolo mebise fa'mene minalo. To bahatini hiti aku'i li hepite minalo. To lenali bomagi lenali lihatini mehe'mi epalalo.

**12** Boana'i luga'amagihi kaga lilugi, kehelinogo Sipi Bouba kaga luto keheliloto nolibe lite mekehelilo. Nabaga le'mo babahi higo nolube. Kilisitotoga komopa'a molo emi'ehina bo mone'mofahi liha'auba mono ka mekehelise a'i minalina ai

baha'a hiti minalu'ibe luto nelinogo baha'auba ho lifi mehe'milina'mu yabe.

<sup>13</sup> To Kilisitotoga komopa'a molo emitō mi-nalina a'i mone'mofihī baha'auba mono ka mekehelise minalina ya'ma liha'a hiti koguna huto minalu'ibe luto nekehelinogo liha'auba mehe'mi etalibe.

<sup>14</sup> Yana'mu bati huto minala'ina'mu yabe. Hu'mamofihī ka mekehelise bona'i enalitoga liha'animagihi Hu'mamofihī lusa yauba enalitoga hiti buto nolibe. To mono ka mekehelise ana'i enalitoga ya'ma baha'animagihi lusa yauba enalitoga hiti buto nolibe. Ya nohigo yagapanā'animagi Hu'mamofihī lusa'ani hiti lolo hite neminabe. Enalitoga lusa meminatita yagapanā'ani ya'ma Hu'mamofihī ka'a mekehelise bona'i suhi hite lolo hite minatita'mu yabe.

<sup>15</sup> Mono ka mekehelī'ehilina boubafi to mono ka mekehelilina a'ubafi baha'afi to liha'afi he'mi etoto bilube luto nelinogomo o'e melilo. Hu'mamofihī ka keheli'ehilinauba o'e meluto naga ito li pili kaluta'a meni'ibe. Hu'ma koguna ite hepite minalabe luto elesa molo'ehinamo ni'ibe.

<sup>16</sup> Ya ni'ina'mu a'i kai bahaka hiti hepite minala'ina yamofihī Hu'mamofihī kapogu bahaka le'moto alapihe le'moto mealane? Ya'ma keheli'ahapi, ya? To bo kai lihaka hiti epite minala'ina ya'ma lihaka Hu'mamofihī kapogu le'moto alapihe le'moto mealane? Ya'ma keheli'ahapi, ya? Ya'mu lenali mele'isi mehe'miliyo luto nolube.

*Hu'ma suhi hite minalabe luto lu letō'ehina ana*

*suhı huto minalune*

<sup>17</sup> Lenali lenemeto lenemeto hite Sipi Bomofihı suhi lolo hite minete lite hilabe luto lu lepolo'ehina to Hu'mau elesa molo emina yupahi lolo huto moloto minolata nohina yanamofihı mono kagagu minalo. Nani noto noto Yesuhi naga'amagihi ya'ma kaga lu epito lu laga hulata nohube.

<sup>18</sup> Bona'i luga'amagi Hu'mamofihı keya'a enugufa laga hi epele'ahago Sipi Bouba elesa molo epinogo o henetilanamagi ana huto ana keya'i ya'ma Yuta bona'i enali li mehe'milabe. To bona'i luga'amagi enugufalo Hu'mamofihı keya'i meni'ilinamagihi Sipi Bouba elesa molo epinogo o henetilanamagi ana keya'a kumu ya'ma fegutoga bona'i enali buka metilabe.

<sup>19</sup> Enugufa laga hite minalana to enugufa laga mehise minalana enali'i nasana fa'menena meni'ibe. Hu'mamofihı bagaguti kaga'a kehelite lite minalana nasana yamofihı lamana'a ni'ibe.

<sup>20</sup> Bona'magita lolo hite melete nehago Hu'mau elesa molo epi'ehina yamofihı komopa'aguko minalo.

<sup>21</sup> Kai kele kele pana'i lolo huto nohatogo Hu'mau elesa molo kimi'ehina yana'mu kegekesa loe lae mehinogo ana'asiloko minobo. To kele kele pana'i lolo huto minoto foya lilata nohataguti gulu ho ketalune lite nelinogomo o'e melubo.

<sup>22</sup> Kai kele kele yagapana'i nohatogo Sipi Bouba elesa molo kimi'ehina'a kai Sipi Bouba foipanaguti pa so ketoto gulu ho keto'ehina bomo nohata kehelibo. To kai ya'ma fa'mene nohatogo

Sipi Bouba elesa molo kimi'ehina'a kai Kilisitohi kele kele yagapana'a lolo huto nohata kehelibo.

<sup>23</sup> Yesu ai'a lenali'i mina fi'ehinamo ni'ibe. Ya hu'ehina'mu metoga bona'i hapa'animofahi kele kele'i lolo mehise Kilisitohi kele kele'i hi etete minalo.

<sup>24</sup> Nigibo nalalu'nigita. Lenali lenemeto lenemeto hite ya'ma koyapa'i lite melete nehago Hu'mau elesa molo lepi'ehina analoko yatai kana Hu'mamofitoga hepite minalo.

### *Bo meli'ehina'a hiti keto a'i hiti ka'atiti*

<sup>25</sup> To bolo mebi'ahana ana'mu to liha'ani meli'ahana bo'mu ya'ma Sipi Bomofahi bagaguti kaga meli'ohutaya Sipi Bouba komopa'a nimito nele'mo lamana nohina yana'mu ka'ni nifita ilata nohuna bomofita ya'ma nolube.

<sup>26</sup> Yatai kana'a ya'ma keta huse nasanamofahi komopa'agu nohutogo lenali fa'mene minalana bati hilibe.

<sup>27</sup> To lihaka nohifi mehe'mi etobo luto kehel'i'ohube. To ana'i melise nohapi ana'mofi kumu sa sa mehubo luto kehel'i'ohube.

<sup>28</sup> To a'i lilata yamofahi sibina mehilube'mu hibe. To fa'mene nohilina a'i moneuba baha'alo bilinamofahi sibina mehilina'mu yabe. Anabole neminanamagi nasana'muko keke'i lite minalana, ya suhi lenalitoga huto hu lalibe luto negekesa nokeheluto ya'ma nolube.

<sup>29</sup> Nalalu'nigita, kaga ya'ma lu lepiluna kehelilo. Hu'mau molo'ehina kana asu halube'mu hibe. To kana'a hupamone hu'ehinago liha'ani hiti nehana'amagi bati hite liha'ani menina bo tegi hite Hu'mamofahi foya'a amuya melete minalo.

**30** To yibi hafili hite neminana'amagi minete lite hilanamofifi yibi hafili mehu tegina lolo hinogo minalo. To lenegelo bilata nehana lenali minete lite hilana yauba lenegelo mebi tegina lolo hinogo minalo. To fe'nohi mina fite neminana'amagi fe'nohatini memino tegina lolo hinogo minalo.

**31** To ma melugumofifi yogo fe'nohi molose'na lite ete hilata nehana yamofifi ya mehuse suhi hinogo minalo. Hena'mube? Me'mofifi ya'ma fayaha'a hiti ni'igo bu goto kehelito nominotaya fenene hilube'mu nohigo ya'ma kaga nolube.

**32** Lenali ya'ma fa'menena'mu yamofifi le-negekesa yigiba yigiba hite keta huse'namu minalabe luto kehel'i'ohuto nolube. Bo kofuta nehana'amagi Sipi Bomofifi foya'muko kehelite minalune'mu habe. Minete Sipi Bouba kehelinogo bati hilibe lite lilenogo lilune'mu habe.

**33** Liha'ani hiti nehanamagi metoga nasana'muko kehelilune'mu habe. Ya nehinogo liha'animagi kehelinogo bati hilibe litego lilune'mu habe.

**34** Ya nehite enegekesa loemo nekehelite neminabe. To ana suko hite yafana'i panala'i enali Sipi Bomofifi lili'namuko kehelite minalune'mu habe. Ya nehite komopa'ani enugufa'ani Sipi Bomofitoga molo emilune linogo kehelilune'mu habe. To baha'a hiti ana'i enali metoga nasana'muko kehelilune'mu habe. Ya hiletate baha'animagi keheli laga hilabe lite ya hilune'mu habe.

**35** Lenali bati hite minalabe luto kaga ya'ma lu nolepube. Lenali kapo fi hekini nologopa, lenali

negi menese komopatini li nupa hite melelenogo  
Sipi Bomofitoga asagato minete agoya hi emite  
minalabe luto nolube.

<sup>36</sup> To bo moneuba ai pa'a ya'ma bolo bilina leg-ege hulenogomo ya'ma kaba huto le'mo mololoto nohinogo komopa'agu laga'a besinogo kosele'i henogomo baha'alo ho lifilube'mu nohutomo, ho lifilina ya'ma sibina mehilube'mu hibe.

<sup>37</sup> Ya hilinamoya bo moneuba komopa'atu ma luto keheli amuya malalube'mu hibe: Pa'ni ya'ma fa'mene minalibe luto kehelinogo pa'a minalibe, keta mebesinogomo lu huto huto lu laga hinogo bati hilube'mu hibe.

<sup>38</sup> Ya hu'ehina bo moneuba ai pa'a baha'a lilibe luto keheli emilina ya'ma bati hilube'mu hibe. To moneuba pa'a ho melifise le'mo mololoto minalina yamofiji bati huto mino lito tilube'mu hibe.

<sup>39</sup> A'i moneubafi moneuba baha'auba moloto hilina, hilina'a huto mino lito buto minalinagihe. Baha'a fililenogo ya'ma bo moneto bilube lutomo bilibe. Ya hu'ehinaya sibi saba huto mino lito bilina'a meni'ibe. Sipi Bomofitoga komopa'a emilina bolo bilina'mu yabe.

<sup>40</sup> Negekesa keheluna ana a'i bolo mebuse fa'mene minalina ya'ma gelo bito minalube'mu hibe. Ya suhi huto kaga ni'inaya negekesa keheluna Hu'mamofiji Sikalafu'i nanitoga nohigo nolube.

## 8

*Faga lugefa nasanamofiji seba'a epilata ne-hana ka'a*

<sup>1</sup> To faga lugefa nasanamofahi seba'a nelata hi'ahana yamofahi keheluto lu lepilube'mu nohube. Lali asaga bona'magita ana'ina hapa hapa'a akehelilata nohune lite nelaфиe? Yamofahi keheli'ahanaya hapa'a kehelise ago keheliletetini lenugufa le'momo titi nehabe. To komopatini ai eminogo ai eminogo hite to ai he'menogo ai he'menogo hite minalana ya nasanauba lufusatini lolo hu'ehinogo bati hite minalana yabe.

<sup>2</sup> Luga'amagi enali kehelise'nati napa huto ni'ibe lilana ya'ma enali kumu lilune. Kehe-lise'namofahi legeya'a mone'a hiti meli'ahabe luto lilune.

<sup>3</sup> Luga'amagi enali komopa'ani Hu'mamofitoga molo hetofa hilana enali ya'ma Hu'mau kehe-linogo bati hilune'mu habe.

<sup>4</sup> Ya hu'ehina faga lugefamofahi seba'amu ya'ma luto kehelilata nohune: Faga lugefa ai ya'ma nasana lamana'a meni'ibe. Hu'mau ai moneko lamana'a nohibe.

<sup>5</sup> Fato fagalo kene'i silaga'i kokulumagu to melugu nehabe lite lilata nehabe. To foipa luge-fanamofahi sipi bona'i to enighiti nehana kene'i babu luto nehana keheli'ahanaya.

<sup>6</sup> Lali ya'ma Hu'ma afotifu moneko'i nohibe luto keheli'ohutamo ni'inagi aitogati ana'ina silaga'i huto hu su ho'ehina. To laliya ai kumu ni'ibe luto hilune luto nohune. To Sipi Bo mon-eko'i Yesu Kilisitohi ai yanagu ana'ina silaga'i huto hu'ehina to lali ai yanuguko nohune.

<sup>7</sup> Ya huto ni'inaya bona'i luga'a enali ya'ma hapa'a ya huto ni'ibe lite mone keheliya ilana'a

mehabe. To ya hana'amagi enali koyapa'i to yatai hiti lugefamo lusi kene'i nohibe lite kehelilata hi'ahanamagi komopa'ani lapa mebi'ehinagi to enali seba'a nete ana lugefamofiji amuya'amu keheligo ketana lolo nohigo nete komopa'ani le'mo sibina hilata hi'ahanamo ni'ibe.

<sup>8</sup> Hu'mau ai nose'na nonotana to menonotana yamofiji kehelinogo sibina lolo mehilube'mu hibe. Seba'a nolata'na yamofiji kehelinogo sibina hilifihe? To menolata'na kehelinogo bati hilibe. Aitoga ya huto meni'ibe.

<sup>9</sup> To bonatinitoga mone ya huto ni'ifi, meni'ifi kehelilo. Fa'mene luga'amagita lenali lengekesa kehelite fa'mene nalune lite nehana'amagita lenalalutinighi mono kagu amuya memele'ahanamagihi enali komopa'ani li sibina hi lalagi, ya'mu kehelinogo keta lepesino.

<sup>10</sup> Kai komopaka hokolo hinogo minalata lugefa nasanamofiji nonugu seba'a noto nehitogo, kalalukafu moneuba kehelinogo komopa'a keta huto lapa mebinogo nohilinauba bu kogoloto ya'ma luto lilina'mu yabe: Nonanago nani ana huto nalube luto luloto nalube'mu hibe.

<sup>11</sup> Noloto'a ya'ma kalalukafu mono ka'a nesi'a keheli'ehina bouba Kilisitou mina fi'ehinamo ni'inago kai komopakagu buloto foipa huto sibina mehilina ni'ifihe?

<sup>12</sup> Lenali ya suhi nehite lenalalutinighi enele'mo mumusopa i epelete komopa'ani enele'mo sibina hilata nehabe. Komopa'ani li sibina hi epalalana ya'ma Kilisitohi le'mo sibina hilana'a suhi huto lolo hilina'mu yabe.

<sup>13</sup> Ya hu'ehina'mu nani lugefa nasanamofiji

seba'a nenenogo nalalu'nifu ya nasana'mu yabe luto keheli sibina hu lalibe luto ai kumu kehelugo keta hu lalifihe luto lugefanamofifi seba'a mo sito nohuto minomo buto minalube.

## 9

*Aposolo bona'magi foya hapi fi'ahanamofifi ka'a*

<sup>1</sup> Nani kumu henabe lite nekehelibe? Mone lulata bomofifi koko pana'a nohibe lite nelafihe? Ya menohube. Nani Hu'mamofifi koko pana'a nohube. Nani kumu ya'ma aposolo bo menohibe lite nelafihe? Nani lusi aposolo bo nohube. Nani ya'ma Sipi Bo Yesu bu mego'ohufihe? Bu go'ohube. Foya'nimofifi legeya'a Sipi Bomofifi nehe'mose'nagu huto hulata nohina yamofifi lenali ya'ma ya suhi menehafihe? Nehabe.

<sup>2</sup> To bona'i luga'amagi kumu aposolo lolo mehibe linogo lenali nani kumu aposolo bo nohibe lite nekehelibe. Aposolo foya'nimofifi legeya'a Sipi Bomofifi lusalo huto hu'ehina'amofifi lenali ya'ma nehabe.

<sup>3</sup> Hapa'nimu lilata nehana enali kaga ya'ma lu gelehe ito lu epilata nohube.

<sup>4</sup> Luga'amagi enali lalitogati nani foya'ni li'ohunaloti nose'na yafi nagami'i menalibe lite lu laga hi netalafihe? Bati mehilibe.

<sup>5</sup> Aposolo luga'a enali to Sipi Bomofifi gonamu tamu'a hiti to Pita enali ana'i yagapanan'ani hiti mono foyalo bilata nehago nose'na epilata nehabe. To lali ana suko huto lihati hiti mono foya lilutamoya nose'nati menimilana yamofifi bati hilifihe? Bati mehilibe.

<sup>6</sup> To nani hiti Banabasi hiti le'alisigo le'eyatu foya lilata nohutoti'a nose'nat'i'a lilata nohu'ibe. Enali suhi huto le'ayatu lili'na melise naluta lu laga hu le'ete'ahana yamofahi bati huto ni'ifiye? Mehu'ehibe.

<sup>7</sup> Kibina bo enali luba hilana nasana to nose'na'ani enali'ani efaha'anitu mina filata ne-hafi? Menehabe. To moneuba foya lito li huto huto hekele'ehinogo lito menalina ni'ifihe? O'e. To moneuba bulumaka yaga kaba huto amiha'ani menalifihe? Nalibe. Ya'mu lenali nose'na le'emilo, luto nolube.

<sup>8</sup> To kaga luto nolunamofahi ya'ma metoga bona'magihu kaga nolube. Ya hu'ehinaya mono bukugu kaga hiti anagu huto nohibe.

<sup>9</sup> Moseu keya ka lu'ehina kaga ma luto lu'ehinamo ni'ibe: *Bulumaka moneuba foya noli epoloto kifi nalube'mu nohinogomo o'e melilo.* To Hu'mau kaga ya'ma lu'ehina bulumaka enali kumuko melu'ehibe.

<sup>10</sup> Bona'magita lalimo hiti lu'ehinamo ni'ibe. Foya lilata nehana enali legeya'a huto higo nalune lite kehel'i'ehite hekelelata nehana ya bati hulata nohibe.

<sup>11</sup> To nani Banabasi hiti le'ali ya'ma lenalitoga komopatinimofahi nasana legeya'a hekololata nohu'ina yanamofahi mina'a lenalitogati le'agufamofahi nasana lilu'ina'mu keheligo keta nohifihe?

<sup>12</sup> Luga'a enali lenalitogati nose'na fe'nohi lilata nehana ya nasanauba bati hu'ehinamo ni'inaya lama'naka le'ali hiti ana suhi huto linogoti bati hilinamoya le'ali hapi huto foya li'ohu'inagati ema meli'ohu'inamo ni'ibe. Kil-

isitohi ka lamana'amofahi kapo fi hekini lo eto lalu'ifihe luto lenalitogati nose'na fe'nohi lilabe lite li'ahanamo ya'ma he'miloto ketana lito humofa'na hulata nohu'ibe.

<sup>13</sup> Sipi mono nonugu foya nelina'amagi enali mono nonugutiko ite neana nose'na luga'a nelata nehabe. To logo'nogo hite kuguhi koyo emilata nehana bona'i logo'nogo hite nose'na laita hite nelata nehabe. Ya nehana'a ya'ma lenali menekehelibe.

<sup>14</sup> To ai Sipi Bomofahi ka'a leli'ali bona'i lali ana suhi huto ka lamana'a kehel'i'ahanaloti lugufamofahi nose'na lilabe luto lu lepolo'ehinamo ni'ibe.

<sup>15</sup> Ya hu'ehinaya nani'ni ya'ma kapogu menobube. To lenali ya'ma ana suhi li netalabe luto kehel'i'ohuto fayahya ya'ma mekoyobe. To bo moneuba ya'ma nani suhi huto Hu'mamofahi ka lu nolepito mina'a melise negelo bilata nohuna li sibina hu lalibe luto yamofi kumu kehelugo keta nohinago fililata nasanauba nanitoga lilifihe? luto yana'mu kehelugo keta mehuse nohibe.

<sup>16</sup> Ka lamana'a lu huto hulata nohube. Yana'mu lusi bo nohube luto liluna yamofahi bati mehilina'mu yabe. Lili'na'amofahi nani nugupisalo molo'ehinamo ni'ibe. Ka lamana'a lu yege mehotita akae, bati mehina suhi huto minotita'mu yabe.

<sup>17</sup> Foya ya'ma nani'ni negekesa kehelito li huto huto lutita yamofahi minomo buto mina'a lutita'mu yabe. Nani'ni negekesa kehelito meli'ohunamo ni'inago yamofi kumu ma luto ni'ibe. Hu'mau ana foya nugupilo molo netago

lilata nohube.

**18** Ya hu'ehina'mu mina'a lilata nohunamofhi ma luto ni'ibe. Nani mono foyalo nobuto ka lamana'a mina'ani meni'ina bona'i lu epilata nohube. Ya nohuto ka lamana'a lulanamofhi mina'a lugufamofhi nose'na'a lilitana'mu li'ahana ya'ma he'milata nohube. Nani negelo bise'namofhi ya'ma mina'a nolube.

**19** Nani asaga bona'magihi kele kele bo'ani menohube. Aku'i bona'i yege yege'i ya'ma Kilisitotoga enele'mo malalube luto fa'mene kele kele'ani lolo huto nohube.

**20** Yuta bona'i Kilisitotoga enele'mo malalube luto Yuta bo enalitoga minoto, Yuta bona'magihi suhi lolo hu'ohuna. To nani'nimu Moseu keya ka lu'ehina kagamofhi kele kele'i hu etoto ni'igopa keya kalo kele kele'i hi etelata nehana bona'i ya'ma Kilisitotoga enele'mo malalube luto enalitoga mino moloto keya ka lu'ehina kamofhi kele kele pana'a suhi lolo hu'ohuna.

**21** To fegutoga bona'i enali Moseu keya ka lu'ehina ka mekeheli'ahana bona'i Kilisitotoga enele'mo malalube luto fegutoga bona'magi enalitoga mino moloto keya ka mekehelise bo suhi huto lolo huto mino'ohuna. Ya'ma Hu'mamofhi bulo ya'ma ai'a lu'ehina ka'a mege'i memalalube luto melilube, nani'ni Kilisitou lu'ehina ka'a mege'i moloto keheliya i'ohube.

**22** To bona'i mone'a komopa'anigu Hu'mamofhi kagagu amuya'ani menina Kilisitotoga enele'mo malalube luto nani amuya'ni menina bo suhi huto lolo huto mino'ohuna. Nani ya huto fato fato bona'i

enehe'malube luto bona'i fato fato bona'i  
enalitoga minoto fato fato suhi lolo hu'ohunamo  
ni'ibe.

<sup>23</sup> Silaga nasana yamofahi fa'mene ka lamana'a  
huto holito bilibe luto lolo hulata hu'ohube. To  
Hu'mau lusa nogi epoloto nani hiti lusa gi netal-  
ibe luto lulata nohube.

<sup>24</sup> Lenali ma lite menekehelifiye? Yokolo'na  
lolata hepato ya'ma yagapanamagi enali yege  
yege'i hololu lilata nehana nasana ya'ma  
moneko'uba kohe toto hololu luba luba huto  
henetito mina'a lilata nohibe. Lenali ana hite  
Hu'mamofitoga bite sekele mamuti lilune lite  
hololu lilo.

<sup>25</sup> Yagapanamagi yokolo'na hilana enali enugufa  
amuya malalune lite hapi fite fato fato leg-  
ege hite elata nehabe. Lilune'mu nehite enali  
sekele mamu nasana fa'menena'mu ya suhi hi-  
lata hi'ahana yabe, lali ya'ma sekele mamu'a  
minoba minoba nasana'mu ya suhi hilune.

<sup>26</sup> Nani'ni hiti ya'ma hololu lulata nohuna  
yamofahi keya'a hiti nasana bu go'ohuto fo-  
togo huto hololu lulata nohube. Nani foya  
li'ohunamofahi nani ho fetaga mehube.

<sup>27</sup> Nani bona'magihi mono ka lu epi epi huto  
nohuto nani'ni fa'menena lolo hu'lalube luto  
nugufa'ni lelito limito moloto kaba'a hu etoto  
nominobe.

## 10

### *Faga lugefamofahi lipite agoya mehi etalo*

<sup>1</sup> Nalalu'nigita lali tatatigi lolo hite melete  
hi'ahana yana'mu kehelilabe luto lenelepilugi

kehelilo. Moseu Iyipi metogati enele'moto nobigo enali yege yege bona'i sopohuba ifi to epalago bi'ahana enali asaga'i hege nagami'i lite bi'ahana. Ana nagami'mofiji gi'a Safa Nagami'i yabe.

<sup>2</sup> Ya nehite Mosehi mege'i malalabe luto sopo-huba to hege nagami'uba asaga'i mono nagami'i lolo higo fele'ahana.

<sup>3</sup> To enali ka melugu nebago Sikalafu'uba koku-lumaguti nose'na li huto hu epigo asaga bona'i nete mine'ahana.

<sup>4</sup> To Sikalafu'uba efanuguti nagami'i li huto hu epigo asaga bona'i ne'ahana. To ana efahi Hu'mamofiji Sikalafu'uba li huto higo yauba enemege'i moloto bu'ehina. Ana efahi yamofiji Kilisito yabe luto yatai lali nokehelune.

<sup>5</sup> Ya hu'ehinaya Hu'mau ana Isilaeli bona'i luga'a enali kumu foke ka meli epalago kame metoga fili su he'ahago sekuya'ani i tili tele hu'ehina.

<sup>6</sup> To Yuta bona'i tatatimagi enalitoga nasana huto hu'ehinamofiji lali legekesa li hokolo huto huto hu'ehinamo ni'ibe. Lali ya'ma foipa nasana'mu lipoti melenogo ana suhi lolo hu lutigi.

<sup>7</sup> Enalitogati luga'amagi faga lugefa nasana'mu lipi emite agoya hi emite mine'ahana. Lenali ya'ma ya suhi mehilo. Yamofiji mono bukugu ya'ma fayah ma lite keye'ahanamo ni'ibe: *Bona'i enali meto minete nete nete ete ho tilete faga lugefa nasanamofifi gelo bite melekehi hi'ahana.*

<sup>8</sup> Ya hilete moko lise nasana fato fato'mofiji li huto hite mine'ahana ya suhi mehilune. Enal-

itogati luga'amagi ana nasanamofhi foipana li huto hite minago Hu'mau nona'a epigo ana moneko'isi yupahi moneko bona'i luga'a babu lite fili'ahana'a ya'ma 23,000 fili su he'ahana.

**9** To mone yupahi hiti enalitogati luga'amagi Sipi Bo kumu komopa'a bati hina bo nohibe lite fi taga hi etago, Hu'mau enoho lifi'ehina osifa'magi hen'i epalago fili su he'ahana. Lali hiti ya huto Sipi Bomofhi fi taga mehu etalune'mu nohune.

**10** To mone yupahi hiti enalitogati luga'amagi Hu'mamofhi bugu nefigo enoholata bo agelouba enoho'ehina. Lali hiti ya mehilune.

**11** Enalitoga nasana huto hu'ehina yanauba lalitoga sipina lipoti nomalana yamofhi bu galune. Me'i hiti kokulum'a hiti kana'atiti hupamone nohinagu nohune. Kaga ya'ma legekesa lite yamofhi beto hite fayahi keye'ahanamo ya'ma ni'ibe.

**12** Ya hu'ehina'mu ya'ma moneuba ai'amu kehelito Hu'mamofhi kagu amuya moloto nohilina bouba buto sibina hu laligi, yamofhi legeso huto kaba huto minalibe.

**13** Lenalitoga lenimi'i mololata nasanauba huto huto o henetilina ya'ma noto noto bona'i asagatoga ana suko huto hulata nohibe. Ya hu'ehinaya Hu'mau keheligo ule'ale hulata bo nohinago fi betaga hube nohina nasana moneuba huto huloto lenali amuya be ligito enele'mo felu halina'a lolo nehinogomo Hu'mau ai'a lenele'mo bati huto amuya lepito bihu komogetalo lenelepilenogo bite fa'mene mineba mineba minalana'mu yabe.

**14** Ya hu'ehina ya'ma nalalu'nigita lugefa nasana faga faga lugefa nasanalo meminese hite-tini eto hite minalo.

**15** Lenali komopatini lenegekesa hiti'namo ne-habe. Yamofahi kaga'a ya'ma lilugi lenalitini kehelite bu go fe lilo.

**16** Konugu ya'ma bai nagami'i Kilisitou lusa gito molo'ehinamofahi ya'ma nonototi Kilisitohi go-laha'a lusa gito molo'ehina ya'ma guna ito lilata nohune. To beleti lusa gito molo'ehina ya'ma nonototi Kilisitohi gufa'a lusa gito molo'ehina ya'ma guna ito lilata nohune.

**17** Yupala nose'na ya'ma moneko'i nose'na lali asaga'i nolata nohune. Ana suhi luto lali asaga bona'i i hepito moneko'i lolo hulata nohune.

**18** Lenali ya'ma Isilaeli bona'magi kumu ke-helilo. Enali Hu'mamofitoga kuguhi keyete nose'na nelata nehana bona'magi mamufa gilata hitalo Hu'mamofitoga moneko'na hite i hepilata nehabe.

**19** Kaga nolunamofahi hapa'a ma huto ni'ibe. Lugefa nasanamofahi seba'a nelata nehana nasana fa'menena ni'ibe. To lugefa nasana ai hiti fa'menena ni'ibe.

**20** Hu'mamofahi mekeheli'ahana bona'magi enali seba'a nelata nehana ya'ma Hu'mamofih kumu meni'ibe. Sibi felemagihu seba'a nelata nehabe. Ya hu'ehina'mu nani'ni ya'ma lenali hiti sibi fele hiti i hepilana bati mehibe luto keheli'ohube.

**21** Sipi Bomofahi konuguti nelete to sibi kene'magihu konuguti nelete hilana ya'ma kohi loeguti nolata'a meni'ibe. To Sipi Bomofahi

hitaloti nelete sibi felemagihi hitaloti nalana'a meni'ibe.

<sup>22</sup> Lali foipa felemagihi seba'a nonogomo Sipi Bomofahi ita bi laligi lali enohoka mehilune. Lali amuyatiuba ai'a ya'ma be meligi'ehibe.

<sup>23</sup> Lenali ya'ma nasanalo asaga'i lilutamo ni'ibe lite lilata nehanaya silaga nasana lilenogoti ya nasanauba lele'mo bati mehilube'mu hibe. Ana'ina silaga'i liluta'a ni'ibe lilata nehanaya ya'ma nasana silaga'i lelito nobuto mono ka le'mo hetofa hiluta'a meni'ibe.

<sup>24</sup> Yamofi kumu nani ma nolube, bo moneuba ai ai'na'ago yana'mu kaba huto mekehelise lalu'afi kumu hiti kehelino. Lenalalutinighi enehe'mete hetofana hu epalalo.

<sup>25</sup> Lenali ya'ma maketigati yaga nose'na mina fito nalune lite lilete mina fite nalo. Ya nehite faga faga lugefa nasanamofahi nonuguti ni'ifiye lite kehelinogo komopatini keta hinogo lebesi lalibe lite enoloka mehete fa'mene nalo.

<sup>26</sup> Yamofihi mono bukugu fayahi ma lite keye'ahanamo ni'ibe: *Metoga nasana silaga'i ni'ina yamofihi afo'afu Sipi Bo ai'a nohinagi lali asaga nose'na bati huto nalune'mu nohune.*

<sup>27</sup> To Hu'mamofahi kaga mekehelilata bo moneuba nose'namu elesa molo lepi'ehinogo ya'ma noha'agu tilune litemo tilanagihe. Tinogo nose'na lenubulo molo lepilenogo ya'ma lengegesa kehelinogo komopatini keta mehinogo fa'mene nalabe. Fa'mene nelete felemagihi seba'a ni'ifihe lite loka mehe etalo.

<sup>28</sup> Fa'mene nenenogo bo moneuba ya'ma yaga ya'ma lugefa nasanamofahi seba'a ni'ibe luto lu

hokolo huto lu nelepinogomo ana bomofi kumu kehelinogo keta nehinogomo he'mite mo silo.

<sup>29</sup> Lenalitini komopatini sibina hilina'a meni'ibe. Lenalalutinighi komopa'ani sibina hu lalibe luto nolube. To nani komopa'ni keta menohigo henabe luto ai komopa'a keta nohinaguti kehelito'ni mo silune lite nelafiye?

<sup>30</sup> To nani Hu'mamofahi fokehi holoto nose'na nalunamo ni'inaya, Hu'mamofahi fokehi holoto naluna nasana'mu moneuba nehabe luto keheli sibina nohibe lite nelafiye?

<sup>31</sup> Nani lenali kalo nona'a ma luto nolube. Lenali nose'na nalune'mu nehitemo to yafi nagami'i nalune'mu to silaga'na hilune'mu Hu'mamofahi gi'a huto huto hilibe lite ya suhi lolo hilabe.

<sup>32</sup> Lenali Yuta bona'i nehana to fegutoga bona'a nehana to Hu'mamofahi bona'a naga'i enali enubulo keheli sibina hi'ehilana nasana yamofahi li huto mehilo.

<sup>33</sup> Nani ana suhi huto bona'i fato fato enali bu negenogo bati hilibe luto nohuto'ni nani'ni nasana'ni bati hilibe luto meni'ibe. Asaga bona'magi Hu'mau enubuto bise'na'a lilabe luto foya'a lito nominobe.

## 11

<sup>1</sup> Nani Kilisitou ito bu'ehina giyakagu ito mege'i mololata nohubo. Lenali ana suhi hite nani nigliyakagu ite nemege'i malalo.

*Ana'magi kakili'ani bilanamofahi ka'a*

<sup>2</sup> Lenali yamofahi lolo huto moloto hu'ohunamo ka keheli su he'ehite nani lu yege ho'ohuna

kaga kehelilete yamofahi ka'a mege'i melete neminabe. Yamofi kumu nokehelugo laga'ni nebesilata nohibe.

<sup>3</sup> To kaga mone linogo'ni kehelilabe, kehelilo. Bo ya'ma ana'magihi afo'anigita nehabe, to Kilisito ya'ma bomagita afotinifu nohinagi to Hu'ma ya'ma Kilisitohi afo'afu nohibe.

<sup>4</sup> Bo moneuba ai lataha'alo kakili'i bi'ohuto Hu'mamofitoga ka lilinafi to Hu'mamofahi ka lu huto huto hilinafi ai Kilisitohi le'mo laba hilina nasana lolo hilube'mu hibe.

<sup>5</sup> To a'i moneuba kakili'i mebise Hu'mamofitoga ka lilinafi to Hu'mamofahi mono ka lu huto hilinafi ya'ma baha'amofahi le'mo laba hilina nasana lolo hilube'mu hibe. Ya hilinamofahi ya'ma ana'i luga'amagihi oka'ani laga hi su hete neminana ana'magihi tegi lolo hilube'mu hibe.

<sup>6</sup> Ya hu'ehina'mu a'i moneuba mono nonugu tito lataha'alo ana'ina ifi toloto ya mehu'ehinogomo ya'ma lataha'alo oka'a laga hi su hete le'mo hupamone hi etalo. To a'i moneuba oka'ni he'mi netenogo nubuya'ni hilibe lilina a'uba kakili'i li biloto mineno.

<sup>7</sup> To bomagi mono ka lilana kanalo lataha'anilo ana'ina lite ifi telete minalana bati mehilina'mu yabe. Hena'mube? Enali ya'ma Hu'mamofahi nasana hiti to Hu'mamofahi sekele mamu'a lolo hi'ahabe. To ana'i enali ya'ma bomagihi sekele mamu'a nehabe.

<sup>8</sup> Hu'mau ai bo ya'ma a'mofitogati lito lolo mehu'ehinagi a'i ya'ma bomofitogati lito lolo hu'ehina yabe.

<sup>9</sup> To Hu'mau bomo ya'ma lihakamofi kumu yabe luto le'mo huto mehu'ehibe. A'i ya'ma bo-

mofi kumu yabe luto le'mo huto hu'ehina yabe. Ya'ma ana'i enali ya'ma bomofiji sekele mamu'a nehabe.

<sup>10</sup> Yamofiji mono ka'a lite nehago agelo bona'magi bu gete neminabe. Ana'i enali bomagihi kaba hise'na'animofiji keya'a mone ya'ma lataha'anilo kakili'i lite ifi telete minalana yamofiji bati hilube'mu hibe.

<sup>11</sup> Ya huto ni'inaya bona'i ya'ma ana'magihi kaba nehanaya to ana'i ya'ma bomagihi kaba nehana yamofiji Sipi Bomofiji bulo ya'ma boana'i fato fato'mofiji minalana yamofiji laga mehilina'mu yabe.

<sup>12</sup> Yata'a ana'i ya'ma bomofitogati lito lolo hu'ehinamo ni'ibe to yatai kana bomagi ana'magitogati huto huto bona'i i futili huto nominone. To bona'i hiti ana'i hiti silaga'i yamofiji Hu'mamofitogati huto hu'ehina nasana ni'ibe.

<sup>13</sup> Lenalitini kehelite bu go bati hilo. A'i moneuba lataha'alo ana'ina bona'i li gehesa hilanaga ifi metose Hu'mamofitoga loka halina yamofiji bati hilina ni'ifihe?

<sup>14</sup> To bo moneuba oka'a yatamalo ni'inogo minalinauba yamofiji hapa komopatitu kehe-linogo bati mehilube'mu hibe. Yamofiji hapa'a koyapa'i mono ka mekehelise minana kanagu akeheli'ahanamo ni'ibe.

<sup>15</sup> To ana'magihi lataha'anilo oka yatamalo ana'ina ifi te'ahana sekele mamu'a Hu'mau epi'ehina'a legi huto ni'ibe. Ana'magihi oka'ani yatamalo minana'mu lite ya'ma keheligo fokehi lilata nohibe.

**16** Moneuba ya'ma kaga keheli he'milube'mu nohuto ma luto kehelino. Fato suhi yamofifi lali hiti Hu'mamofifi naga'a luga'a hiti mone lito menohune.

### *Yupala nose'nalo li nupa hise'na*

**17** Ana'ina mone kumu keheli sibina hulata nohuna yamofi kumu lenofokehi meluse lengekesa lito lu lepilugi kehelilo. Lenali mono kalo li nupa hilete komopatini li mehepise loko hilata nehite mono kauba lenele'mo bati mehilibe.

**18** To mono kagu li nupa nehago lenali komopatini loko hulata nohibe lite lu nimigo lama'na ka nelafihe luto mone kegi'a kehelube.

**19** To loko hi'ahanauba hiya bona'magi Hu'mamofifi bulo mono ka'mu amuya melelata nehana le'mo huto hulata nohibe?

**20** To lenali Sipi Bomofifi yupala nose'na nalune'mu li nupa hite minete nose'na nelata nehana ya'ma Sipi Bomofifi nose'na meni'ibe.

**21** Lenali nose'na lelitete no bati mehise lenalitini mele'isi eto eto hite nelago bona'i luga'a kau'namu filite minelata nehabe. To bona'i luga'amagi bai nagamiko nete nete komopa'ani enegekesa sibi saba hulata nohibe.

**22** Lenali nohatini meni'igo ya suhi lolo hilata nehaifihe? Lenali nose'na nalune litemo nohatiniluga minete nalo. Lenali Hu'mamofifi bona'i enali kumu keheligo enumuhi meni'ina bona'i enali keheli sibina enubuya hina suhi lolo hilata nehabe. Ya nehana nasana'mu henabe luto lu lepilube. Lenofokehi lilufihe? O'e lenofokehi melilube.

**23** Lenofokehi melilube luto henabe nolube? Koyapa'i lu lepi'ohunagi Sipi Bo Yesuhi ya'ma mil'mi hu'ehina sinipogu

**24** beleti nose'na liloto Hu'mamofifi foke ka luto gofa hoto noepito lu'ehina: Ya'ma nani nugufa'ni lenali kumu luto nolepube. Nani kumu keheli nimite ya hite nete minalo.

**25** To nose'na nelago bai nagami kohi ana suhi huto lito ma luto lu'ehina: Ya'ma konugu Hu'mamofifi mu tifise'namofihi ka'a kosaba'namofihi golaha'ni malalunamo ni'ibe. Nalana'amu nalana'amu ya'ma nani kumu keheli nimite ya hite nete minalo.

**26** Asaga yupahi lenali ya'ma beleti nose'na hiti bai nagami'i hiti nalana'amu nalana'amu Sipi Bo molo'ehinagi ai fili'ehina ka'a lu huto huto hite mine lite bite nehinogo ai i behe huto limilina'mu yabe.

**27** Yamofifi bona'i luga'amagi enali Sipi Bomofifi beleti nose'na hiti bai nagami'i hiti li sibi sibi hiti nalana ya'ma Sipi Bomofifi gufa'a hiti golaha'a hiti li sibi hinogo foipana huto hilina'mu yabe.

**28** Yamofifi beleti nose'na hiti bai nagami'i hiti nalune'mu nehitemo kohe tete komopatinigu kaga ni'ilina sa sa hilete nalo.

**29** To bo moneuba Sipi Bomofifi gufa'amofifi hapa'a keheli fe meluse fa'mene nalina yamofifi foipana huto hilube'mu higo Hu'mau nona'a guna malalibe.

**30** Ya hu'ehina'mu lenalitogati luga'amagi yupa la nose'namu keheli fe meluse fa'mene ne lenogo kana'amu kana'amu amuya'ani meni'ina

to epesise'na huto hulata nohibe. To luga'a fililata nehabé.

<sup>31</sup> Lali hapati'mu sa sa huto lu huto huloto minotita ya suhi huto Sipi Bouba yanamofhi nona'a melimitita'mu yabe.

<sup>32</sup> Ino bano minaluta yamofhi Sipi Bouba lali hapati li huto huto osahi limilube'mu hibe. Lenali mono ka mekehelise bona'i hiti mino sibi hite nehité sibina hi lalabe luto ya suhi hu letolata nohibe.

<sup>33</sup> Ya'mu nalalu'nigita, lenali yupala nose'na nalune lite nehitemo li nupa hite minete bona'i luga'amagi kumu enegeba hite nehinogo o neheti su helenogo hapi fite nalo.

<sup>34</sup> Moneuba ai nose'namu kau'na sipi henogomo noha'aluga minoto kohe toto neno. Li gehesa hite li sibi sibi hi'ehinogo lenalitoga foipana huto hu laligi. To kaga luga'a nani'ni nobuto le'mo fe lilube.

## 12

### *Sikalafu'uba mono kamofhi amuya'a limilata nohibe*

<sup>1</sup> Nalalu'nigita, Sikalafu'uba amuya fato fato'mofhi limilata nohina hapa'a keheli sibi hise kumu lu lepilugi kehelilo.

<sup>2</sup> Lenali koyapa'i mono ka mekehelise bona'i nehago lenegekesa fi hekini lago negi nete nasana luga'amofhi faga faga lugefagu bite i hepilata hi'ahanamo yamofhi keheli'ahanamo ni'inagihe.

<sup>3</sup> Yanamofhi megesa'aga linogo'ni kehelilagi keheli'ehilo. Bo mone'mofhi Hu'mamofhi

Sikalafu'uba le'mo babahi higo Yesuhi le'mo gumi'i molo emitō melilube'mu hibe. To Sikalafu'uba babahi mehinogo Yesu ya'ma Sipi Bo'ni nohibe luto melilina'mu yabe.

<sup>4</sup> To mono kamofiji amuya'a fato fato'mofiji ni'inaya Sikalafu'i moneko'uba ana amuya'a limilata nohibe.

<sup>5</sup> Mono kamofiji foya'a fato fato suhi huto ni'inaya foyamofiji afo'afu Sipi Bo ai moneko'i nohibe.

<sup>6</sup> To mono'mofiji amuya fato fato'mofiji foya'a lilata nohutaya Hu'mau moneko'uba lehe'mago lilata nohune.

<sup>7</sup> Sikalafu'i yauba monolugu bati hite minalabe luto mono'mofiji amuya'a silaga'i guna moloto limi su holata nohibe.

<sup>8</sup> Mone'mofiji ya'ma Sikalafu'uba le'mo babahi higo mono ka keheliya ito lulata nohibe. Moneuba ana huto Sikalafu'ubago le'mo babahi higo fato fato hapa'a lu bati huto lulata nohibe.

<sup>9</sup> To bo moneuba ai ana Sikalafu'moubago le'mo babahi higo Hu'ma kumu keheli ule'ale hinalo amuya nasana huto hulata nohibe. Moneuba ana Sikalafu'uba le'mo babahi higo epesi'ehilina bona'i enele'mo ye kolata nohibe.

<sup>10</sup> To moneuba topa hose nasanamofiji foya lilibe luto amuya nohibe. Moneuba Hu'mamofiji bagaguti ka'a lilibe luto komopa'a ekesa li hokolo hu etolata nohibe. Moneuba ya'ma ana'ina silaga'i Hu'mamofiji Sikalafu'mofitoga ni'ina meni'ina nasanamofiji hapa'a bu go bebe salibe luto komopa'a ekesa li hokolo hu etolota nohibe. To moneuba fato ka bona'magihi

enonogo'aniguti mono ka sibigopa lilibe luto baga le'mo babahi hulata nohibe. Moneuba enali enonogoguti lu hokolo huto lu epilibe luto baga le'mo babahi hulata nohibe.

<sup>11</sup> Ya nasanamofahi amuya silaga'i Sikalafu'i moneko'uba ai'a ekesa kehelito le'mo eto eto huto guna moloto limi su holata nohinamo ni'ibe.

*Lugufa'a moneko nehepinogo kele kele nasana moneko'i minalibe*

<sup>12</sup> Bona'magita lali Kilisitohi lugufa moneko'na tegi huto nohune. To lugufamofahi kele kele nehi etana nasana ligi layahati lokaba labaga lubu legekesa yamofahi babu luto ni'ibe. Enali ya'ma nekisa'a li nupa hago lugufa moneko lolo huto ni'ibe. Kilisitohi gufa'a ana suhi huto ni'ibe.

<sup>13</sup> Sikalafu'i moneko'uba lalitoga limiloto mono kagu lele'mo nupa higo lugufamofahi suhi huto moneko'i lolo huto nohune. Sikalafu'i moneko'uba lali'i asaga'i mono'i folo leto'ehina lugufamofahi suhi huto moneko lolo huto minalune luto lele'mo nupa hu'ehibe. Ya higo lali Yuta bona'i to Giliki bona'i, kele kele bona'i to fa'mene nohuta bona'i lali moneko Hu'mamofahi Sikalafu'i lito komopatigu molo su holoto moneko'i lolo nohune.

<sup>14</sup> Lugufamofahi kele kele'na ya'ma moneko'i meni'ibe. Babu lite nehabe.

<sup>15</sup> Yamofahi ligigusauba ma luto melilube'mu hibe: Nani yaha'a menohube. Ya hu'ehina'mu gufamofahi nekisa'a menohube luto luloto lugufa he'miloto ai'asigo meminalube'mu hibe.

**16** To legekesauba ma luto melilina'mu yabe: Nani bu'a menohunago ya'ma gufamofifi nekisa'a menohube luloto lugufa he'miloto ai'asigo meminalube'mu hibe.

**17** Lugufalo ya'ma lubugo minatita lugufa'auba hena huto ekesa kehelitine? To lugufago ya'ma legekesago minatita lugufa'auba hena huto tu bitine?

**18** Yamofifi ya huto meni'ibe. Hu'mau ya'ma ai'a ekesa keheli fe luto lugufamofifi kele kele'a asaga'i ya'ma foyaga fato fato'mofihi enele'mo tulu hu'ehina.

**19** Lugufamofifi nekisa'a moneko'i minatita lugufa ya'ma sibina huto fa'menena lolo hitine.

**20** Yatai ya'ma kele kele nasana babu luto ne-hago lugufa moneko'i ni'ibe.

**21** Ya hu'ehina'mu lubu'uba layapofifi ma luto lu meemilube'mu hibe: Kai lali lufusati meno-hatagi he'miloto bubo. To latahatiuba ligi-gusamofifi ya luto melu etalina'mu yabe: Kai lali lufusati meno-hatagi he'mito bubo.

**22** Ya huto meni'ibe. Lugufamofifi nekisa'a luga'a amuya nasana ya'ma meminatita lali mino bati huto meminotita'mu yabe.

**23** To lugufamofifi nekisa'a mone kumu kehelutogo limite nehana'a yamagiji kaba hu epololata nohune. To lugufamofifi buya'a hulata nohina nasana yamofifi guketetu ifi toto sekele mamu hulata nohutaya.

**24** Lubuya mehuse nasana ya'ma huto'i minelata nehabe. Hu'mau ya'ma lugufa li huto hu'ehina lugufa nekisa'a limite nehana'a enali'i kaba hu bati hu'ehina.

**25** Lugufamofahi nekisa'a enali fato fato hite meminese legege hite ai kele kele'i hu etenogo ai kele kele'i hu etenogo hite minalabe luto foya epi'ehina.

**26** Ya hu'ehina'mu lugufa nekisa'a mone'mofahi kota'i helenogo keke'i lilinamofahi luga'amagi enali hiti keke'i lu baga ilana'mu yabe. To lugufa nekisa'a mone'auba bati huto minenogomo luga'a silaga'magi enegelo bi su hete enegelo bilana'mu yabe.

**27** Ma suhi huto ni'ibe. Lenali asaga'i li nupa hite Kilisitohi gufa'a legi huto moneko'na lolo hite kele kele'i hi etete nehabe.

**28** Lali Kilisitohi naga'a lolo nohuta bona'magita ma huto nohune. Hu'mamofahi naga'a lalitoga ana huto enele'mo eto higo nehabe. Yata'a luga'a aposolo lele'mo eto hulago lali foya ti'ehibe. Yaloti limito Hu'mamofahi ka'a lu yege hose bomofahi bagaguti kaga lu huto hulata bo. Analoti limito Hu'mamofahi ka hapa'a enelepise bo amuya suhi fato fato'mofahi li'ahana bo, enele'mo eto hu'ehina. Analoti limito topa hose nasanamofahi lolo hu'ehina bo to amuya'aloti epesina bona'i enele'mo ye kose bo hiti to enehe'malata bo to foya kaba bo to fato fato enonogoguti fa'mene kaga lu huto hilata bo, enele'mo eto hu'ehina.

**29** Lali asaga'i aposolosigo lele'mo eto hu'ehina ni'ifihe? To lali asaga'i ka'a yege hose bagaguti kaya lu huto huto bonago hiti lele'mo eto hu'ehina ni'ifihe? To lali asaga'i mono ka hapa'a enelepise bonago lele'mo eto hu'ehina ni'ifihe? To fato fato topa hose nasanamofahi suhi li huto

hilata bonago lele'mo hu'ehina ni'ifihe? O'e, o'e,  
ya huto meni'ibe.

<sup>30</sup> To epesina bona'i enele'mo ye kelata bonago  
lele'mo eto hu'ehina ni'ifihe? To fato fato enono-  
goguti fa'mene lu huto hilata bonago lele'mo eto  
hu'ehina ni'ifihe? To enali enonogoguti lu hokolo  
hite lu neepina bonago lele'mo eto hu'ehina  
ni'ifihe? O'e, o'e, ya huto meni'ibe.

<sup>31</sup> Ya'mu lenali mono kamofiji amuya'a tito  
nina'a lilune lite amuya malalo.

To nani amuya nasanamofiji kapo lamana'a  
enebe ligilanamofiji ka'a lenelepilugi kehelilo.

## 13

### *Lemehi epito enehe'molata ka*

<sup>1</sup> Nani niginaga mefise nohuto bona'magihi  
enonogo'anigutifi to agelo bona'magihi enono-  
gogutifi mono ka lutita nani fa'mene minotine.  
Ya'ma fa'mene pepe notina nasana belo nogo ya  
suhi huto fa'menena lolo hutine.

<sup>2</sup> To nani Hu'mamofiji ka lu huto huto hulata  
bo lolo huto huto'ni Hu'mamofiji suguna ka'a  
yamofiji keheli su ho'ohuto'ni to Hu'mamofiji  
kamofiji nekisa mokisa'a hiti keheli su hoto  
nohuto'ni to nani linogo kosa mone li sibi hu  
he'milibre luto keheli ule'ale hu'ohuto'ni niginaga  
mefise fa'mene minotita fa'menena lolo hutine.

<sup>3</sup> To anal'ina asaga enumuhi meni'ina bona'i  
enehe'malube luto fe'noha'ni he'mi su holoto  
to enali kumu luto nugufa logogu he'milotu'ni  
niginaga mefise fa'mene minotita fa'menenamo  
ni'inago ya nasanauba nele'mo bati mehitita'mu  
yabe.

**4** Eniginaga fise nehilana bona'magi enipakafa mehese agoya hite minalune'mu habe. Enali siko mehise enali'ani'mu kehelinogo metinogo enali'ani enigi'ani lelite metilana'mu li saga mehilune'mu habe.

**5** Eniginaga fise nehilana bona'magi enali bebe mesose hapa'ani melise, yogo fe'nohi li pili mekose, hipa mehi epelese, bona'magihu foipana lu gehe meli epelese,

**6** foipa nasanauba i futili nehinogo enegelo mebise, lamana'amofifi nasanauba i futili nehinogo enipagu batihuse'na kehelilune'mu habe.

**7** Eniginaga fise nehana bona'magi enali keta'a hiti nasana fa'mene kosele'ani meenehenogo kofilana'mu yabe. Ana'ina'mu asaga'i kehelite amuya melete minalana'mu yabe. Komopa'aniguti Hu'mamofifi agoya hu emite enifita ite minete Hu'mamofifi kagu amuya melete minomo buto minalana'mu yabe.

**8** Eniginaga fise nasana ya'ma su mehose minoba minoba hilina'mu yabe. Hu'mamofifi baga'aguti lu huto hulata ka yamofifi su halina'mu yabe. To fato enonogoguti lulata nasana ya'ma su halube'mu hibe. To kaga fato fato'mofifi hapa'a kehelilatana hiti ya'ma su hoto fenene hilina'mu yabe.

**9** Ka hapa'a kehelilatana hiti lu huto hulata ka lulata nohuta yamofifi ifo haya'alo ni'ibe.

**10** Minoto aliha'a ya'ma minoba minoba nasana hapa'alo huto nohinogo ifo haya'alo ni'ina nasana su hoto fenene hilina'mu yabe.

**11** Nani yagapanai inapuhi lolo huto minoto inapu ka luto mino'ohuna, to

inapupagi kehelilata nehana enegekesa kehelito mino'ohunamo yata'isi ya'ma olopa bo lolo huloto'n'i, yagapanala'i inapupagihi nasana ahe'mi'ohube.

<sup>12</sup> Ana suhi huto yatai kana'a kehelilata nohuna ya'ma gapo gapo'uba lokaba labaga li gelehe higo bu goto bu go fe luse mehu'ohuta ya suhi huto ni'ibe. Aliha'a ai bulo bu genogo ai bulo bu genogo huto bu galune. Yatai kana'a kehelise'na hiti mone kegi'a anasi keheli'ohune. Alihi kana'a keheli su halune. Aliha'a yamofahi legeya'a lamana'a lubulo huto hinogo Hu'mau lali hapati keheli su ho'ehina ya suhi huto lali bu goto keheli fe luto kehelilune'mu hune.

<sup>13</sup> To minoba minoba hilana nasana ya'ma yabe. Hu'mamofitoga keheli amuya nomolota to huto hilina'a sa sa huto geba nohuta to liginaga fise nohuta yamofahi nasana loebe monebe nehanaya liginaga fise nohuta yamofahi le'mo kohe to'ehibe.

## 14

### *Hu'mamofahi bagaguti kaga beto hu epilata nohutauba tito ni'ibe*

<sup>1</sup> Ya hu'ehina'mu lenali bona'i leniginaga fi epelete enehe'malune lite nelitemo amuya malalo. To analo'i Hu'mamofahi Sikalafu'a nolepina amuya luga'a lilune lite nelitemo amuya malalo. Ya hite nehite Hu'mamofahi bagaguti ka'a lu huto hilata nasana'muko kehelinogo tino.

<sup>2-3</sup> Luga'amagi fato enonogoguti fa'mene ana'asi lilata nehana ya'ma bona'i lu meepise Hu'mamofahi lu emilata nehabe. Enali

ya'ma Sikalafu'uba enele'mo bati hu'ehigo Hu'mamofifi suguna ka'a nelago bona'i luga'amagi keheli negi nelata nehanaya, Hu'mamofifi bagaguti kaga'a lu huto nehana enali bona'i monolugu enele'mo olopa hilata nehabe, to enele'mo amuya melelata nehabe, to enele'mo ba yegelata nehabe.

<sup>4</sup> Fato enonogoguti ana'asi lilata nehana enali komopa'ani le'mo hetofa hilata nehanaya Hu'mamofifi bagaguti lu huto hilata Hu'mamofifi kagu nehanamagi enele'mo hofa telata nehabe.

<sup>5</sup> Lenali fato enonogoguti lilana hapa'a li su halabe luto keheli'ohunaya, Hu'mamofifi bagaguti kaga'a li huto hilana'mu yabe luto kehelinogo tilina'mu yabe. Hu'mamofifi bagaguti kaga'a beto hilata nehana bona'magi fato enonogoguti lilata nehabe ya'ma enebe ligi'ehibe. To fato enonogoguti nelinogomo to bo moneuba ka'ani lu gelehe huto lu hokolo hilina bo nohinogomo ana ka nelanauba asaga bona'i Hu'mamofifi kagalugu enele'mo hofa talabe.

<sup>6</sup> Nalalu'nigita, nani lenalitoga nobugo Hu'mau lu huto huto lu nimi'ehina ka'a to mono ka hapa'a mone luga'a to komopa'nigu keheli'ohuna ka'a to Hu'mamofifi ka'a komopa'niguti beto hutolenelepise ka'a lu huto hu nolepito fato enonogoguti kaga lu nolepinogo yanauba hena hena huto fi hele hu lepalalibe?

<sup>7</sup> Fa'mene nasana sipilohi yamofifi hetofa lite fu melinogomo ya hena huto nogo sipi malalina kehelilune.

**8** To ufehi enonogo'a bati huto fu melilana ya'ma henana'mu kehe noibe lite bite luba hilana nasana le'mo bati mehilana'mu yabe.

**9** Ana suhi hite lenali fato nogoguti lilana yamofahi bona'i luga'amagi hena hena hite kehelilabe. Fa'mene fato enonogoguti nelinogo kagatini yamofahi habafahuba li sibi saba hinogo fa'menena lolo hilube'mu hibe.

**10-11** Negekesa keheluna noto noto fato fato enonogo ni'ibe, to keheliluta kamogo ni'inaya, fa'mene nani enonogo mone keheli sibina hiluna ya'ma enonogomofahi afo'afu nani kumu kehelito fato hepato bo lolo hiluna'a hube, to nani ana suhi huto ai kumu kehelito fato hepato bo lolo hiluna'a nohibe.

**12** To lenali hapatini ana suko huto ni'ibe. Sikalafu'mofahi amuya lenalitoga huto hilibe lite amuya melelata nehanamofahi bati huto ni'inaya, Yesuhi naga'a Hu'mamofahi enele'mo hofa talabe litemo amuya malalo.

**13** Ya hu'ehina'mu fato enonogoguti kaga fa'mene ana'asi lilana bona'magi hapa'a bati hilete lu hokolo hite lu epilanamofahi amuya lilune litemo Hu'mamofitoga kehe ilabe.

**14** Nani fato enonogoguti Hu'mamofitoga lilunamofahi nipa'niguti tinogo lilube'mu hube. Negekesa'niuba nasana lamana'a li huto mehilina'mu yabe.

**15** Ya hu'ehina ya'ma hena hena hilube? Ya suhi hinogo bati hilube'mu hibe. Sikalafu'uba komopa'nigu babahi higo nani Hu'mamofitoga loka nohago negekesauba keheli fe nolinogo nabagatu lu huto hilube. Sikalafu'uba komopa'nigu mono

nama hiti noligo ana huto negekesauba keheli fe nolinogo nabagaloti lilube.

<sup>16</sup> Ya mehiluta ya'ma kai komopakatuko Hu'mamofifi fokehi halube luto lilata yamofifi kaitogati ya suhi keheli bati mehilata bona'i luga'amagi kai kaka mekehelilana'a ni'inaya enali hena hena hite lama'naka yabe lite lilabe.

<sup>17</sup> Kai Hu'mamofifi fokehi lamana'a lilata'a hetofana hiti kalalukafu ya'ma keheli bati mehinogo hena huto komopa'a le'mo hetofa hu etalibe?

<sup>18-19</sup> Fato enonogoguti kaga lulatana yamofifi nani ya'ma babu luto lulata lenebe ligito lulata nohube. Ya hu'ohuna'mu Hu'mamofifi fokehi lilata nohunaya, nani ya'ma kehelinogo lamana'a lolo hitine. Li gehesagu fato enonogoguti kaga yatamalo lilube lutomo fa'mene lutita ni'inaya nani ya'ma kehelugo nolimibe. To komopa'ni negekesatu keheli fe luto bona'i enele'mo bati bati hilube luto ya'ma mono ka loesimo lu epilatana'mu yamofifi kehelugo notibe.

<sup>20</sup> Nalalu'nigita, fato enonogoguti kaga lulatana'mu yagapana inapupagi suhi hite minete foipa hapa'a mekehelilo. Ya hite, minalanaya yagapana inapupagihi kehelise'na hiti meminalo. Enali kaga keheli fe menelibe. To lenali kaga kehelite le'mo fe lilune lite ya'ma olopa bona'magihhi kehelise suhi lilo.

<sup>21</sup> Mono bukugu kaga mone ma lite fayahi keye'ahana:

Sipi Bouba ma luto nolibe:  
Nani mone fato hepatoga bona'i  
enele'menogo

enali ete ma bona'magihi  
 ya'ma fato enonogoguti  
 nani nabagaguti kaga lu epilanamoya  
 fa'mene ka'ni mekehelilana'mu yabe.

**22** Anamofahi luga'a ka lilugi kehelilo. Fato enonogoguti kaga sibigopa lulatana yanauba Hu'mamofahi ka keheli'ahana bona'magi kumu luto babeyafa'a huto menohibe. Hu'mamofahi ka mekeheli'ahana bona'magi topa halabe luto babeyafa'a ni'ibe. To Hu'mamofahi bagaguti ka'a bati huto lu huto hu epilata'a yanauba Hu'mamofahi ka mekeheli'ahana bona kumu yabe lutomo meni'ibe. Hu'mamofahi ka keheli'ahana bona'magihi ya'ma lufusa'ani ule'ale hulata ni'ibe.

**23** Ya hu'ehina'mu lenali asaga'i Yesuhi naga'a li nupa hite fato enonogoguti kaga lite nelinogo, yamofahi kana'a mono ka mekeheli'ahana bona'ifi to fegutoga bona'ifi tite kehelite negi nagi nenabe lite kehelilune'mu habe.

**24** To Hu'mamofahi bagaguti ka'a bati huto lu huto huto nehinogo, Hu'mamofahi mekeheli'ehina bofi, fegutoga nehana bo moneuba lenalitoga tito ka kehelilube'mu hibe. Ya hilinauba ya'ma asagato foipana'amofahi hapa'a lu huto hi etete ka foyagu le'mo malalana'mu yabe.

**25** Ya hileno komopa'agu nasana fala kito ni'inamofahi huto hileno ai mino fe luto melugu golaga fito minoto Hu'mamofahi lahupa fi emitio Hu'mau lama'naka lenalitoga nohibe luto lilube'mu hibe.

*Mono kamofahi nasana neheti su hoto nehetino*

**26** Nalalu'nigita, ya hu'ehina'mu hena hilune? Lenali mono kamu'i li gehesa hilune lite nehitemo ya'ma Hu'mamofifi kagagu lenele'mo moneko moneko'i hite hofa talanamofifi hapa'a ya'ma hilata nehabe. Moneuba mono nama lelito olata nohibe. To moneuba kaga giyaka lito lu epise kaga lelito olata nohibe. Moneuba Hu'mamofifi bagaguti kaga'a fato fato'mofifi lelito olata nohibe. Moneuba fato enonogoguti lulatamofifi lelito olata nohibe. Moneuba fato enonogoguti lu'ehina kagamofifi hapa'a lu hokolo hilinamofifi lelito olata nohibe. Ana suhi asaga lilana Yesuhi naga'a enehe'moto amuya molo epalalibe lite ya suhi hilo.

**27** Fato enonogoguti kaga lilana yamofifi asaga bona'magita melilo. Loefi loeyagi moneyagifi enalisigo ya suhi lite moneko moneko nelinogo moneuba hapa'a lu gelehe huto lu epino.

**28** Mono kagu li gehesa hite nehite hapa'a lu gelehe huto lu epilina bo mone menehingomo to moneuba fato enonogoguti lilube'mu nohuto'amo ai kaga luse mineno. Ai'asigo mone-toga nohuto ai'a ka hiti to Hu'mamofitoga lino.

**29** To Hu'mamofifi bagaguti kaga ya'ma bona'i loemofi, loebe monebefi enali lu huto hite lilune'mu nehinogomo, luga'amagi enali nekelelite kaga'ani loko hite kehelilana'a legeso hite minalabe.

**30** To li gehesa hi'ahanalo mone bouba legeso huto nohigo Hu'mamofifi Sikalafu'uba komopa'agu yuhufa kaga emigo lilube'mu nohutomo kohe toto lilina bouba ya'ma fa'mene nohinogo lino.

**31** Ya hite, Hu'mamofifi bagaguti kaga lilune lite nehitemo, fa'mene lu su halabe. Ya nehit moneko moneko lilenogo, luga'a enali mono ka kehelinogo komopa'ani babahi hilibe.

**32** Hu'mamofifi bagaguti kaga lu huto hilana bomagi lu huto hilana'mu kaba hite minalabe lite li'ahanamo ni'ibe.

**33** Hu'mau ya'ma le'mo sibi sibi hilina nasanamofifi afo'afu menohibe. Ai'a lele'mo fu luto minalina'muko ekesa kehelilata nohina afo'afu nohinagihe.

Kilisitohi naga'a asaga'i mono kalo li nupa hite nehago ya'ma

**34** ana'magi enali kaga melise fa'mene mineno. Ana'magi ana li gehesagu kaga lilana meni'ibe. Ana'i ana suhi hite kaba bo meminalabe luto Moseu keya ka lu'ehina kagu ya'ma limite minalabe lutomo ni'ibe.

**35** Enali mono nasana mone kumu loka halune lite nelitemo noha'aniluga minete baha'animagihi enoloka henogo lu keheli fa keheli hilabe. A'i moneuba mono kalo li nupa hi'ehilanagu kaga lilinamofifi lubuya huse nasana ni'ibe.

**36** Hu'mamofifi kaga'a lenalitogati hapi huto hulago ya suhi lilata nehafihe? To lenalitinisigo keheli'ahana ni'ifihe? O'e, ya huto meni'ibe.

**37** Lenalitogati moneuba ai'amu kehelinogo, mono ka lu huto hulata bo lamana'a lolo hilina to komopa'agu Sikalafu'a hiti bo lolo hilina ya'ma, ka fayahi koyoto nolepuna asaga'i yamofifi Sipi Botiuba lu molo'ehinamo ni'ibe luto kehelino.

**38** Bona'i moneuba ya'ma kaga keheli he'milina yamofifi ai kaga'a mekehelilo.

**39** Ya hu'ehina'mu nalalu'nigita ma lite ke-helilo. Hu'mamofifi bagaguti kaga li huto hilune litemo amuya malalo. Fato enonogoguti fa'mene ana'asilo lulatanamofifi o'e lite meli epalalo.

**40** Mono kumu li nupa hite minete ana'ina silaga'i hite melete hilana yamofifi lamana huto legeso huto bu baga ino.

## 15

### *Yesu fili'ehinaguti ho ti'ehinamofifi ka'a*

**1** Nalalu'nigita ka lamana'a alu lepugo ke-heli'ahabe. Ana kagamo aku'i lu lepilube. Giyaka giyaka fito lu lepugo lite lufusatini alolo hu'ehinamo ni'ibe.

**2** Lenali ana ka lamana'a lu lenelepi'ohunamofifi li pili kete li'ehinogomo ya'ma le'mo ye ko sibina mehu'ehinogomo ya'ma, lenubuto bilube'mu hibe.

**3** Mono ka tito ni'ina ka'a lu nimi'ehina'asigo lenali'i lu lepito ma luto lu lepi'ohube: Kilisitou lali foipanati'mu fili'ehina ya'ma mono bukugu ai ana hilibe lite koyapa'i emasana keye'ahanamo ni'ibe.

**4** Filigo keli hete'ahana mono bukugu li mele'ahana kana'a loebe monebe keligu minoto mopo huto ho ti'ehina.

**5** Ho tiloto kohe toto buto Pitahi huto hu be li'ehina, analoti buto Pita hiti pana'alobo luga'a 12 asagatoga huto hu enebe li'ehina.

**6** Analoti bona'a naga'i 500 enali li nupa hite ne-hago analo huto hu enebe ligo be ge su he'ahana. Enalitogati asaga enubu hiti nehanaya mone'a fili'ahana ya'ma kanagu nokoyobe.

<sup>7</sup> Analoti gona'a Yemesihi huto hu be li'ehina analoti aposolo asaga'i huto enebe li'ehina.

<sup>8</sup> Alihi ya'ma nani mone fato kanagu neketo'ehina pana tegi huto nohugo huto hu nebe li'ehina.

<sup>9</sup> Nani aposologuti limito nohube. Nani Kilisitohi naga'a kalana'i molo epoloto enohoto hu'ohuna bo aposolo yabe luto nigi'ni mololago nelesa'ni ligo nohube.

<sup>10</sup> Nani aposolo lolo huto nani hapa'ni fato fato huto ni'ina yamofiji Hu'ma komopa'a hokolo hina boubabu lu netago lolo hu'ohube. To ai komopa'a bati hina boubabu aposolo lili'nalo nele'mo malago fa'mene lolo mehube. Nani foya li'ohuna yamofiji aposolo luga'a enebe ligito li'ohuna yabe. To nani henan'ililoti lutine? Hu'ma komopa'a bati hinauba nanitoga minago li'ohube.

<sup>11</sup> To nani foya lito lu huto huto lepi'ohuna ka ni'ifi to aposolo luga'amagi foya lite lu huto huto lepi'ahana ka ni'ifi, moneko ka ni'ibe. To lenali keheli ule'ale hi'ahana ka moneko'na ni'ibe. Fato fato ka meni'ibe.

*Yesu fili'ehinguti ho ti'ehina'mu lali hiti ana  
huto ho tilune'mu hune*

<sup>12</sup> Kilisitou ya'ma fili'ehinaguti ho ti'ehina ka ma luto lu noleputogomo lenalitogati luga'amagi henabe luto fili'ehilana bona'i aku'i ho tilana meni'ibe lite lilata nehabe?

<sup>13</sup> Ya'ma fili'ehilana bona'i aku'i ho tilana meni'ibe lite nelana kaga yamofiji lamana'a meni'ibe. Ya huto lamana'a ni'itita Kilisitou fili'ehinaguti ho metitine.

**14** To Kilisitou ya'ma ho metitita mono ka noluta ya'ma fa'mene'mu lutogo lenali fa'mene'mu lenifita ite minatine.

**15** To mone hiti ni'itita'mu yabe. Lali Hu'mamofi kumu lu'ohuta ya'ma ai'a Kilisitou fili'ehinaguti le'mo ho ti'ehinamo ni'ibe luto lulata nohutaya filise'naguti le'mo ho metise nasana ni'itita Kilisitohi Hu'mau le'mo ho metitine. To yamofahi kaga'a lu'ohuta ya'ma Hu'mamofi kumu lu'ohuta ka faga faga lutita'mu yabe.

**16** Fili'ahana bona'i ho metilabe luto ka ya'ma lamana'a meni'itita, Kilisitohi le'mo ho metitita'mu yabe.

**17** To Hu'mau ya'ma Kilisito fili'ehinaguti le'mo ho meti'ehina ka'a lamana'a ni'itita lenali lenifita neitita kagauba fa'menena lolo hitita'mu yabe. Hena'mube? Lenali foipanatini ya'manauba minatita'mu yabe.

**18** To Kilisito kumu keheli ule'ale hilata nehana fili'ahana bona'i haya kalatita'mu yabe.

**19** To lali Kilisitou yatai ma melugu nohuta kana'asigoko lele'mo bati hilina ni'itita bona'i luga'a asaga'magi lali kumu kehelite keke'i nelinogo ate ate luto minutita'mu yabe.

**20** To ya huto meni'ibe. Kilisitou ya'ma lama'naka fili'ehinaguti aho ti'ehina yabe. To ho notito fili'ahana bona'i ana hite tilabe luto kohe toto ti'ehina.

**21** Ya'ma hapa'amofahi ma ni'ibe. Bo mone Atau ai fililata nasana le'mo kohe to letoto fili'ehina ana suhi huto fato bo moneuba Kilisitou fili'ehilutaguti ho tiluta nasana le'mo kohe to letoto ho ti'ehina.

**22** Lali asaga'i Atahi naga'a nohuta yagi asaga'i fili su haluta'a huto nohune. To ana suhi huto lali Kilisitohi naga'a nohuta bona'i asaga'i keliguti ho ti su halutamo ni'ibe.

**23** Fi lehe tete ho tilabe luto lu leto'ehinalo ho tilune'mu hune. Kilisitohi le'mo kohe to letoto ho ti'ehinamo ni'ibe. Alina kana'alo ya'ma ai naga'a lali ho tiluta'mu yabe.

**24** Analoti alisha'a minoto asaga'na su halina kana'a huto hilibe. Ana kanagu Yesu ai'a enighiti bo to sipi kaba bona'i hiti to Satahi amuya bo'a enali amuya lelito limi su holoto ya'ma me'i kai kapoka yabe luto afotifu Hu'mamofiji yanugu melelenogo kaba nohinogo kana'a su halina'mu yabe.

**25** Yatai ya'ma Kilisitou foya'a lito kaba huto mino lito nobinogo Hu'mau fateha'amagihi gi fehupa'aga enele'mo malago foya'a li su halube'mu.

**26** Ya huloto yalo fatehati bo sipi'a ho fililube'mu hibe, gi'a ya'ma filise nasana yabe.

**27** Yamofiji mono bukugu ma lite fayah keye'ahanamo ni'ibe: *Hu'mau bona'i hiti to ana'ina asaga'i ya'ma ai'a gigusa'aluga lele'mo molo su halina'mu yabe.* Ana ka ya'ma kehelilete Hu'mamofi kumu hiti lu'ehina kaga ni'ifhe lite mekehelilo. Hu'mau ai'a Kilisitohi gigusa'aluga lele'mo nupa hulata nohibe. Ai ya'ma Kilisitohi gigusaluga meminalina'mu yabe.

**28** Hu'mau ai'a bona'i hiti to ana'ina silaga'i ya'ma pana'amofiji gigusaluga lele'mo nupa hinogo pana'auba ai afo'afifi gigusaluga minoto agoya hu etalibe. Ya hulenogo afo'afu minomo

tito lebe ligi su halina'mu yabe.

**29** Lenalitogati luga'amagi fili'ahana bona kumu yabe lite mono nagami'i felelata nehabe. Fili'ohutaguti ho tiluta'a meni'itita ya'ma henabe lite nefalabe? Lenali fili'ahana bona'i luga'amu lengekesa kehelite nagami'i folo epolo'ahana, keliguti ho tilata'a meni'itita henabe lite ya hi epelelata habe?

**30** To fili'ohunaguti ho tise nasana'mu keheli amuya memolo'ohutita nani henabe luto ya'ma noho fililuta nasanamofhi gupisalo keta'a hiti asaga yupahi nominobe?

**31** Nalalu'nigita, Sipi Boti Yesu Kilisitou ai'a nani lili'nagu lenele'mo molo'ehina yamofhi kehel'i'ohuto'ni Hu'mamofhi bulo ma luto nolube kana'amu kana'amu fililuta nasanauba lifito ago nominobe.

**32** Nani ya'ma Efeso hepatoga lopi yagakafa legi hite nehana bona'i hiti luba fito mino'ohuta yabe. To bona'magihi ka'aniya nani ya huto fililuta nasanalugu mino'ohunamomu'i ya'ma henana lamana'a huto hu nimilibe? Fili'ohutaguti ho tilata meni'ilina yamofhi nani ya huto mino'ohunanauba fa'menena lolo hilibe. To fili'ohutaguti ho tilata meni'ilina'a yamofhi lenalitogati bona'i luga'amagi ma lite ligo bati hitine: Yago fililuta ni'igi yatai nose'na yaga hoto nagami'i hiti laba lona noto minalune.

**33** To ya huto meni'ibe. Bona'i mone'amagi ya'ma kaga lilata enali lenele'mogopa hi lalagi ya'ma enali ka'anilo nolube. Sibi humofa'na nehana bona'magitoga bite i ke'malana bona'magi

enali komopa'anigu ana hite sibina hilana'mu yabe.

<sup>34</sup> Lenali ya'ma komopatini hokolo hinogo eto hite nehithe foipa nasana lenemegesa hi emilo. Lenalitogati bona'i luga'amagi Hu'ma kumu menekehelibe. Yamofifi fa'mene kehe-linogo lenubuya hilibe luto nolube.

*Filise'naguti lugufati kosaba'i lolo hinogo ho tise nasana*

<sup>35</sup> To luga'amagi ma lite lilabe: Fililago pata si'ehina bona'i enali hena hena hite ho tilanabe? To enugufa enokaba henana tegi hinogo huto hilabe?

<sup>36</sup> Ya'ma kaga sibigopa negi ka nelabe. Lenali nose'na notina hapa'a nekeheliyi? Lenali nose'na bigaha'a lite he kefelata nehanamofifi fa'mene ana'asi tilina meni'ibe. Filito sekuya biloto yalo boloto tilata nohibe.

<sup>37</sup> Biha'a nasana ya'ma fato suhi huto ni'ibe. To nose'na ya'ma fato huto ni'ibe. Moneko okaba hiti meni'ibe. To legeya'a kile'i ni'ina to fato nose'na ni'ina biha'ago he kololata nohune. To he kololotogo notina'a haya'a hiti ya'ma alih'a huto hulata nohibe.

<sup>38</sup> To Hu'mau ai keheli fe luloto lu eto'ehina'a huto gufa'a emi'ehinalo ana suhi huto boloto tilata nohibe. To legeya'a ana huto noha'a ana suhi huto fato'mofifi huto hulata nohibe.

<sup>39</sup> Lugufamofifi hapa'a ana huto moneko'i meni'ibe. Bona'magita lali lugufati ana huto fato'i to yagakafamagihi enugufa fato'i, to namamagihi fato'i, to faya'magihi ana huto fato'i ni'ibe.

**40** Kokulumagu nasana silaga'i ni'ina to metoga ana huto ana'ina silaga'i ni'inaya, kokulumagu nasana silaga'i ni'inamofifi sekele mamu'a fato'i to metoga ni'ina ana huto sekele mamu'a fato'i ni'ibe.

**41** Yegemofifi slikeha'a fato'i, ikahi ai slikeha'a fato'i, sonofi'i enali ana huto slikeha'ani fato fato ni'ibe.

**42** Filise'naguti ho tilatanamofifi hapa'a hiti ana suko huto ni'ibe. Lugufa keli halatana yamofifi fa'mene pata sise'na ni'ibe. To lugufa gololo tilina'a yamofifi pata mesise minoba minoba huto su mehalina'mu yabe.

**43** Keli hose'na ya'ma futu'a ni'ibe. Gololo tise nasana ya'ma slikeha'a hiti ni'ibe. Keli hose'na ya'ma lapa mebinana ni'ibe. Gololo tise'na ya'ma amuya'a hiti ni'ibe.

**44** Keli nohota nasana ya'ma me'mofifi lugufamo ni'ibe. Gololo tise'na ya'ma kokulumamofifi lugufati ni'ibe. Me lugufa ni'ina ana huto kokulumagu lugufamo huto hilibe.

**45** Ya hu'ehina'mu mono bukugu ma lite fayahi keye'ahanamo ni'ibe: Yege bo Atau ya'ma meha'a hiti lolo huto minolata hu'ehinamo yanamoffifi afo'afu lolo huto mino'ehina. To alisha'a Ata tegi bo gi'a Yesu ai'a amuya moloto minoba minoba hilutanamofifi afo'afu lolo huto mino'ehina.

**46** Ya huto ni'inaya kokulumaguti lugufa kohe toto huto hilina meni'ibe. Metoga lugufamo ya'ma kohe tolago kokulumaguti lugufa ya'ma alih huto nohina yabe.

**47** Kohe toto melugu bo Atau ai ya'ma metoti

lolo hu'ehina, ya hu'ehina'mu luto melugu bo mino'ehina. Alihi Ata tegi bo Yesu ai ya'ma kokulumaguti bo limito mino'ehina.

**48** Melugu bo mino'ehina babeyafa huto metogati yagapana'a nohune. To kokulumaguti bo mino'ehina babeyafa huto kokulumaguti nasana lali minalune'mu hune.

**49** To metogati ai meha'a li'ohuta ana huto kokulumagu bomofahi ai meha'a lilune'mu hune.

**50** Bogiyo, kaga mone'ya lilugi kehelilo. Me lugufatu Hu'mamofahi kapogu mebiluta'mu yabe. To fulupa ito fa'menena lolo hilina lugufauba nasana amuya'a hiti minoba minoba huse nasana mone melilinamo ni'ibe.

**51** Kehelilo. Nani suguna ka mone lu lepilugi. Lali mone'a fili su mehaluta ni'inaya asaga'i nominana'a hiti fili'ahana'a hiti lali fa'mene li gelehe huto kosaba lugufamofahi asaga'i lito i kololo bi su halutamo ni'ibe.

**52** Aliha'a su halina kana ufepo neinogo fili'ahanamagi ho tilet fulupa ite tuguma'i mebilana'a minalana'mu yabe. To lubu noha'a fili koto nohiluta'a hiti mele'isi i gelehe huloto fato lugufa lito i kololo bilutamo ni'ibe.

**53** Lugufa ya'ma fulupa ito tuguma'i bilata nohina nasanauba amuya moloto minolata nohina nasana ya'ma gukete suhi huto lito i gololo tilube'mu hibe. To filise'namofahi lolo hu lalutigi minoba minoba nasana lito i gololo bilibe.

**54** To fulupa ilata lugufauba minoba minoba huto minose'na lito i kololo bilina yupahi kaga ma luto mono bukugu koyo'ehinamo huto

hilube'mu hibe: *Minoba minoba nasanauba fililata nasanamofhi be ligi'ehinamo ni'ibe.*

<sup>55</sup> To ka mone hiti ni'ima:

Fililata nasana

kai loho fililata nohata  
amuyaka hiya ni'ibe?

Fililata nasana kai ufehakatu  
lele'mo lagabu'i gise nasana  
hiya ni'ibe?

<sup>56-57</sup> Foipa nasanauba ya'ma fililata  
nasananamofhi ufehe neka'a lolo hu'ehibe. To  
keya ka li'ahana kaga'mu yabe luto foipa  
nasanauba lelepito amuya hiti lolo hu'ehinaya  
Hu'mau ai Sipi Boti Yesu Kilisitohi lu emilago  
foipa nasana be ligilata nohina amuya limilata  
nohinagi, ya'mu fokehi nolune.

<sup>58</sup> Ya hu'ehina'mu nalalu'nigita, lenali amuya  
melete ho ti kibi kibi hite ule'ale hite minalo. Ya  
nehite Sipi Bomofhi foyagu kana'amu kana'amu  
amuya melete lelite bilabe. Sipi Bomofi kumu  
yabe lite foya'a lelite binogo buto fa'menena lolo  
mehilibi lite nekehelite lilo.

## 16

*Yesu naga'amagihi efahi li nupa hilabe luto lu  
epi'ehina*

<sup>1</sup> To yatai lenali Hu'mamofhi bona'magi  
Yelusale hepato nehana kumu yabe lite  
moni efahi li nupa hilabe luto lu lepilugi  
kehelilo. Galesia hepatoga mono bona'magihi  
lu epi'ohuna suhi hite hilo.

<sup>2</sup> Lenali efahi nelina suhi hite ana legegeto  
kehelite fuli yupu yupapo salele napagu ya'ma  
luga'a fuku lite le'mo eto eto hite melete minalo.

Fa'mene nehinogo buto nehe netinogo'ni efahi li nupa hilune'mu ligitagahi hi lalagi yatai li nupa hilo.

<sup>3</sup> Lenalitoga binogo'ni bona'i mone'a enele'mo eto hilana bomagihi fayaha nasana epiloto enoho lifinogo'ni, li nupa hi'ehilana efahi ya'ma Yelusale hepatoga lelite bilabe.

<sup>4</sup> To lenali kehelinogo bati hinogomo nani hiti moneka bilune.

*Polu enalitoga bilube'mu nohuto ka'a lu malago bu'ehina*

<sup>5</sup> Nani Masetonia hepatogati bilube'mu nohunaya anaga buto'ni kana'a nesi'a minoto lenalitoga bilube'mu hube.

<sup>6</sup> Lenalitoga buto kana'a nesi'a minomo netinogo ko'mofiji kana'a su halina ni'ifihe? To kapoga nele'mo bati hilana ya'ma yagafi yagafi biluna'mu yabe.

<sup>7</sup> Nani ya'ma yatai kana yamofiji fa'mene kapoga nobuto lenali'i bu lenogomo biluna yamofiji bati mehilube'mu hibe. Ya hu'ehina'mu Sipi Botiuba kehelinogo lenalitoga buto kana nesi'a minototi bilube luto nolube.

<sup>8</sup> Nani ya'ma Efeso hepatoga nohugo Yuta bona'magiji sipi nose'na nalana yupahi, gi'a Petikosu nelana, ana fuli su halina'mu yabe.

<sup>9</sup> Ya'maga Sipi Bomofiji ka'amofiji kapo'a bili etoto foya'ni huto higo nolugo legeya'a holata nohibe. To ka lamana'amofi kumu fatehe bo'a babu lite nehabe.

<sup>10</sup> Timotiu lenalitoga buto henetilenogo be tig-inogo gufa'a gabu meginogo bati huto minalibe.

To nani Sipi Bomofiji foya lilata nohuna ana suhi huto lilata nohibe.

<sup>11</sup> Ai neheya kola nohina'mu lenali ai kumu kehelinogo melimino. Nani hiti nigibo nagabo luga'a hiti geba huto nohutagihe. Lenali legeso hite kaba hi etete ho lifinogo fulu fulu huto kapoga oba oba huto nanitoga o henetilibe luto geba nohube.

<sup>12</sup> To lalalutifihi Apolosihi ka'a lilugi, lala-lutigiji Kilisitohi bo luga'a enali hiti lenalitoga bilibe ekesa lito ho lifi'ohunamo ai yatai bilina'a babahi mehibe. Yata'isigo ni'igopa kana'a mon-elugu bilina kapo'a hokolo hilenogo lenalitoga bilube'mu hibe.

### *Polu keke'i lu epoloto fayahi koyo su ho'ehina*

<sup>13</sup> Lenali kaba hite minelete Hu'mamofiji ka kehelilatanamofi kumu ule'ale hite minalo. Ya nehite koli mehise gimi bomofiji hapa'a lite amuya melete minalo.

<sup>14</sup> To lili'na nasana silaga'i lilune'mu nehitemo komopatini ai emigo ai emigo hite lolo hilabe.

<sup>15</sup> To nalalu'nigitabe, mone lu lepilugi kehelilo. Lenali Setefanasi to lalameha'a enali kumu ya'ma lite keheli'ahabe: Enali Akaiya hepatogati kohe tete Hu'mamofiji ka kehelilete komopa'ani li gelehe hite Kilisitotoga keheli emi'ahana. To Hu'mamofiji bona'a enalitoga kele kele foya minalune lite lilete lilata nehabe.

<sup>16</sup> Ya'ma lenali ya suhi nehana bona'i hiti to enali hiti Hu'mamofiji foya lite nehana bona'i luga'a hiti enemege'i malalo.

<sup>17</sup> Koliti bona'magi lenali kumu keke'i lu epoloto nohunaga Setefanasi hiti Fotunatasi to

Akaikasi enali nanitoga elago komopa'nigu noke-helugo bati nohibe luto negelo nobube.

<sup>18</sup> Ya huloto'ni nani hiti lenali hiti asaga'i enali'i bu go lu mala huto nohutogo lipagu legelo bi'ohuta. Lenali bona'i ya hana'a enali kumu kehelinogo bati hino.

<sup>19</sup> Esia metoga Hu'mamofahi bona'amagi enali lenali kumu keke'i neli lepalago nolube. To Akuila to liha'a Pilisila etali nonugu mono kumu li nupa hilata nehana bona'magi enali Sipi Bomofi kumu yabe lite lenali kumu keke'i neli lepalago nolube.

<sup>20</sup> Lalalutigita lenali kumu nehaifihe lite asaga bona'magi li'ahana. Lenalitini moneko moneko'i soso hi epelete minalo.

<sup>21</sup> Nani Poluita fayahi koyolata osahi nehe'mose bona'nimofahi yanuguti lito nani'ni keketini nolu lepoloto fayahi ya'ma nayaha'nitu koyo su nohobe.

<sup>22</sup> Moneuba Sipi Bomofihi mehi meemilina ya'ma Hu'mau gumi'i molo etelenogo yabalugu limilibe.

Nani Giliki kaguti: Malana ta, noluto lali kaluguti Sipi Botio kai obo, luto nolube.

<sup>23</sup> Sipi Boti Yesu lehe'mose'na lenalitoga mino moloto mineno.

<sup>24</sup> Komopa'niuba Yesu Kilisito kumu yabe luto lenalitoga minolata nohibe.

**Ka Lamana'a Mono'i Lu Mu Tifi'ehina Ka  
Yabe**  
**The New Testament in the Benabena Language of  
Papua New Guinea**  
**Nupela Testamen long tokples Benabena**

copyright © 1982 Wycliffe Bible Translators, Inc.

Language: Bena-bena (Benabena)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-09-26

---

PDF generated using Haiola and XeLaTeX on 18 Apr 2025 from source files dated 31 Aug 2023

429cb299-5ab9-51c4-8857-9de5c72f8388